

善本書室藏書志

目錄之學肇自西京更生撰別錄於前子駿成七略於後條流派別
兼具解題班氏藝文因斯而就私家編輯始於梁處士阮孝緒隋經
籍志據訂存亡今所傳者則以南宋晁陳兩家爲書林之矩矱焉遂
初兼載重本敏求獨嗜宋刻踵事增華例益加密至於攷撰人之仕
履釋作書之宗旨顯徵正史僻采稗官揚其所長糾其不逮 四庫
提要實集古今之大成若夫辨版刻之朝代訂鈔校之精粗則黃氏
蕘圖蹊徑獨闢惜所見古書錄未能手訂成書而撮拾叢殘猶覺空
前絕後非他書目可比錢塘丁丈松生博極羣書於學無所不通與
賢兄竹舟先生有雙丁之目庚辛之亂於兵火中扶持 文瀾閣書
俾出於險久已名聞海內迨亂定請帑修閣書有缺者爲之鈔寫補
足數十年未已而已之收藏亦日益富造八千卷樓庋藏之又爲攷
其事實臚其得失載其行款陳其同異成藏書志四十卷實能上窺
提要下兼士禮居之長賞鑒攷訂兩家合而爲一可謂書目中驚人

祕笈矣慨自粵逆跳梁東南淪陷縹緲之厄幾等秦灰近海內稱藏書家曰海源閣楊氏曰鐵琴銅劍樓瞿氏曰皕宋樓陸氏與八千卷樓爲南北四大家三家各有書目行世而此志獨晚出其所長則有二焉一在收明人之著述也晁陳收至南宋時代最近今距明末二百五十餘年距明初則五百年閱世愈遠傳本愈難一刻再刻業難攷訂何敢輕棄非變例也一在拾鄉先輩之叢殘也愛日精廬間收國朝人未刻之書今仿其例尤畱意於鄉人雖一卷半帙亦必詳悉備載如有賢子孫欲求先集可望流播以免散遺宅心仁厚於此可見荃孫幼嗜縑素寢饋於中三十年雖無力不能多購然舊家所藏廠肆所出得寓目者亦復甚夥歲在丙子與脩甫中翰訂交於京師時作一瓶之借成戎游浙丈已老病請見未能深憾來游之晚今脩甫昆仲命襄校讎兼志原委挂名簡末誠不勝附驥之幸光緒庚子四月江陰繆荃孫序於鍾山講舍

善本書室藏書志卷一

錢塘丁丙松生甫輯

經部一

周易十卷 宋刊本 孫氏壽松堂藏書

王弼注

此書每半葉八行行十七字首行頂格題周易上經乾傳第一次行低十字題王弼注三行頂格三三乾上下接經文經注繫辭首行題周易繫辭第七次行低十格題韓康伯注三行以下刻繫辭卷九說卦傳格式同卷十首行題周易略例序次行低六格題唐四門助教邢璣注三行刻序文序後另行題周易略例卷第十次行頂格題明彖三行頂格刻略例每卷後半葉邊匡外之上刻乾坤屯蒙及繫辭說卦略例等字字體圓美篆刻精工無明代修補之葉缺筆至慎字止當爲乾道淳熙開刊本

每卷首葉有孫志祖白文方印壽松堂收藏宋本朱文長方印志祖字詒穀一字頤谷號約齋仁和人乾隆丙戌進士歷官江南道御史中年以後鍵戶校書著有家語疏證等凡十餘種壽松堂者孫氏藏書之處也此書據頤谷跋藏其家已五世今閱百餘年爲余所有仍不出武林一步足爲吾杭藏書佳話

周易兼義九卷略例一卷音義一卷

明闕刊本

得一居葉氏藏書

前行題周易兼義上經乾傳第一次行題魏王弼注三行題唐孔穎達正義繫辭以下題晉韓康伯注唐孔穎達正義略例題魏王弼撰附刻音義首行題經典釋文次行題唐國子博士兼太子中允贈齊州刺史吳縣開國男陸德明撰經文每節提行下連注疏次低一格注則夾行前有周易正義序蓋明大理太和李元陽世稱中溪先生爲楊升庵戊寅之畏友於巡按福建時所刊謂之閩本又謂之九行本北監與汲古所刊皆從之出

兼義者儀徵阮氏謂兼併正義而刻之以別於單注本陳仲魚謂他經音義附每節注後獨周易總附卷末故題爲兼義而不稱附音似阮說爲長也有得一居珍藏印當爲甬東葉元堦之書元堦字水心號仲蘭慈谿縣學諸生家富藏書工詩有赤堇山人詩集

周易集解十卷附鄭康成注一卷

明刊本

前有祕書省著作郎臣李鼎祚自序稱刊輔嗣之野文補康成之逸象晁公武讀書志云所集有子夏孟喜至孔穎達三十餘家又引九家易乾鑿度義隋經籍志易類六十九部今舍王弼書皆未得見獨鼎祚所集諸家時可見其大旨唐錄十七卷今止十卷而皆全豈後人併之耶按是書初刻爲宋慶厯臨卽計用章再刻於乾道資中郡守鮮于侃嘉定五年侃之子中之更刻大字於漕司毛子晉得影鈔本轉輾歸陳仲魚詳經籍跋文

此爲胡震亨別從趙清常傳鈔本刊刻有計用章後序而無略
例及鮮于侃與申之兩序又附補鄭康成易注一卷似較汲古
閣雅雨堂兩刻爲佳矣

周易舉正三卷

明范氏刊本

唐蘇州司戶參軍郭京撰

京履貫未詳崇文總目稱爲蘇州司戶參軍前有自序云御注
孝經刪定月令則當爲開元後人序稱曾得王輔嗣韓康伯手
寫真本比校今世行本國學鄉貢學人等本或將經入注用注
作經小象中間以下句反居其上爻辭注內移後義都處其前
又兼脫漏顛倒謬誤增省義理不通今並依定本舉正凡一百
三節分爲三卷傳諸志學者云此明兵部右侍郎范欽訂刊欽
字堯卿號東明鄭縣人明嘉靖十一年進士官兵部右侍郎喜
藏書建天一閣購海內異本列爲四部爲浙東藏書家第一

易講義二卷

楷鈔本

張月霄藏書

宋陳襄撰

右大有謙像隨師六卦見於古靈先生集第二十二二十三兩卷此張月霄摘出鈔本版匡外有昭文張金吾寫定續經解十字寫手精工殆欲繼通志堂而起歟存此以見其慨月霄名金吾又字慎旃昭文人諸生篤志儲藏著有愛日精廬藏書志

東坡先生易傳九卷

明鈔本

山陰邵氏鵬園藏書

是書一名毘陵易傳蓋因元祐黨禁不敢顯題以先生終於常州故稱毘陵老泉著易傳未成屬二子述其志東坡書先成子由乃送所解彙集故蒙卦猶子由所解實蘇氏父子兄弟一家學耳大體近於王弼然弼說惟暢元風此則多切人事仍不相同朱子作雜學辨相摘駁然止十有四條不礙其全書也初刻於明之焦竑重刻於閩齊伋及毛晉此屬舊鈔字體蒼秀有曠

園印當爲山陰祁承燦藏書承燦字爾光又號曠翁山陰人明萬曆甲辰進士布政司右參政治曠園於梅里淡生堂其藏書之庫也其所鈔書世人多未見校勘精核見全祖望藏書記

蘇氏易解八卷

明萬曆刊本

忠州李芋仙藏書

眉山蘇軾著

前有萬曆甲午南京吏部文選司郎中潁川陳所蘊子有序云余得此解於武林卓爾康氏再四讀之知於程朱二家傳義合者不能什二三顧其言縱橫恣蕩奧妙汪洋創爲千古以前未經剖判之論垂爲千古以後不可磨滅之見要以借易之旨而發揮其中自有之奇然於易之旨卒無悖而於傳義異而不害其爲同也舊藏中祕未授剞劂因與同舍郎黃君繼周輩是正梓之有耕讀山房珍藏忠州李芋仙隨身書卷忠州李士棻印

大易疏解十卷

明刊本

眉山蘇軾東坡先生著曾稽錢受益謙之定武林顧賓觀王閱

前有崇禎丙子仲冬顧賓自序云今之習舉業者以朱子本義爲宗講解之家於漢唐注疏宋儒傳錄爲主若夫精理旁通逸詞藻辨上窮先聖之旨下尋諸賢傳注之所未到則髣蘇易解最著矣而世人莫之嗜也余研究評注在坡公發先聖經中之祕以豁羣迷而余亦務揚坡公傳中之意以公同好並有南昌劉日甯江夏黃汝亨萬厯丙申吳之鯨諸序

易學辨惑一卷

鈔永樂大典本

宋邵伯溫撰

案伯溫字子文康節之子南渡後官判轉運副使宋史有傳此書以鄭夫詭稱得邵子真傳作易傳易測明範五經明用數書皆支離破碎因爲此以辨之宋史藝文志但題辨惑一卷書錄解題有易學二字經義攷注曰未見館臣从大典輯出之此則

傳鈔者也

讀易詳說十卷

鈔本

宋李光撰

按光字泰發上虞人崇甯五年進士官至參知政事謫莊簡宋
史有傳學於劉安世以論和議忤秦檜謫嶺南自號讀易老人
因據所得以作是書故陳氏書錄題曰讀易老人詳說宋志作
易傳經義攷注未見此館臣從大典中錄出也

周易古占法一卷古周易章句外編一卷

明天一問范氏刊本

沙隨程迥注

前有宋紹興三十年迥自序云嘗聞邵康節以易數示吾家伯
淳曰此加一倍法也其說不詳見於世今本之繫辭說卦發明
倍法用逆數以尚占知來以補先儒之闕庶象數之學可與士
夫共之不爲識緯讖史所惑於聖人之經不爲無助也迥字可

久由沙隨徙餘姚受經於嘉興聞人茂德嚴陵喻樛於朱子爲
丈人行朱子嘗以師禮事之四庫總目云此書世無刊本藏
書家均傳寫茲則范司馬欽所梓者也有誦芬堂圖書記一印
周易本義十二卷

元刊本

朱竹垞藏書

朱子本義

右書上經一下經二象上傳三象下傳四象上傳五象下傳六
繫辭上傳七繫辭下傳八文言傳九說卦傳十序卦傳十一雜
卦傳十二前有九圖後有五贊朱辭斷手跋云朱子易本義析
爲十二卷以存漢志篇目之舊較之程子易傳依王輔嗣本原
不相同惟因董氏楷輯周易傳義附錄一書乃強合之移易本
義次第以就程傳明初兼用以取士故不復分其後習舉業者
專主本義漸置程傳於不講於是吳人成矩叔度削去程傳乃
不從本義原本更正其義則朱子之辭其文則依程傳次序此

何說哉沿至於今科舉試題父象並發其亦悖乎朱子之旨矣
余嘗求原書不可得今觀此帙秩然不紊中附東萊呂氏音訓
宜亟開雕願諸學官第恐下士見之翻大笑爾後魯良甫元龍
錄敏求記一則惟此不著何人所刊與開雕年月觀其不用永
樂大全與成矩叔度次序當出於元人之手按經文比初六終
來有它吉不作他吉頤彖傳自求口實不作口食繫辭構精不
作構精雜卦傳豐多故下無也字俱與宋咸淳本合有小長蘆
朱彝尊印紅藥山房收藏私印吳興則氏游好在六經香草山
房藏本馬玉堂笏齋諸印彝尊字錫鬯號竹垞晚號小長蘆釣
魚師秀水人康熙己未以布衣薦博學鴻詞授檢討藏書之室
曰潛采堂凡八萬卷見李香子鶴徵後錄紅藥山房耆海甯馬
思贊寒中藏書之所也寒中爲揚州推官麟翔子工書績學家
有道古樓插架多宋元精槧朱竹垞時從錯鈔亦吾杭藏書家

之恒赫者也玉堂字留齋海鹽人道光辛巳副貢性耽書籍纂
漢唐齋諸藏祕冊甚多杜門校讐著讀書敏求續記

周易十二卷

明正德王氏鈔本

張氏正誼堂藏書

朱子本義

右書分上經下經象上傳象下傳象上傳象下傳文言繫辭上
下說卦序卦雜卦爲十二卷末有正德三年餘姚王守仁手錄
十一字書法端正無一苟筆卷端鈐儀封大宗伯賜禮樂各臣
加太子太保諡清恪張公正誼堂藏書方印以馬曰璐南齋祕
笈玲瓏馬氏叢書樓珍藏圖記小玲瓏山館馬佩兮氏藏諸
印佐證之則其書固珍且重矣清恪名伯行字孝先號庵河
南儀封人康熙二十四年進士歷官禮部侍郎從祀孔子廟
廷佩兮名曰璐號半槎又號南齋祁門人家於揚其藏書之所
有叢書樓小玲瓏山館儲藏十餘萬卷著有南齋集

周易十卷

日本刊本

朱子本義

右彖象文言各自分卷不依王弼本與提要所載宋本合首有序例一卷所載九圖及易象筮儀及履夫象不載程傳當依宋刻重雕每葉之上刻倭版周易四字末有延寶三年三月壽文堂舊版燒亡寬政改元己酉年九月再刻成兩條倭國自維新以前頗重文教近數十年改師西彝窮兵黷武海波滔滔安得化以經術識事大之義哉書此慨然

周易十卷

明正統司禮監刊本

程頤傳朱子本義

前有宋元符二年己卯正月庚申河南程頤正叔序次易圖次易說次綱領次程子易傳序次傳義十卷末爲上下篇義次筮儀次五贊經文大字每節提行大字頂格傳及本義夾行低一

格每半葉八行每行經文十四字注十七字明正統間英宗諭旨以五經四書經注書坊刊本謬誤者多命司禮監騰寫重刊以取便於觀覽其版行寬字大樞印頗精蒯惠藝林亦盛典也此卽其一

周易程朱傳義二十四卷

明刊本

前有程子易傳序朱子周易本義序次上下篇義次經傳總目次圖說次五贊次筮儀次上下經二十一卷次繫辭上下傳二卷次說卦傳序卦傳雜卦傳共一卷傳及本義均方規白文標傳本義字每半葉九行每行十七字傳本義夾行字數同每卷末均有巡按福建監察御史吉澄校刊長方木記

周易程朱二先生傳義十九卷

元刊本

晉藩藏書

前有宋元符二年正月庚申河南程頤正叔序次程子上下篇義次朱子周易五贊筮儀每葉二十行行二十二字上下經傳

義十五卷繫辭傳義二卷說卦傳義一卷序卦傳義一卷字大
悅目有晉府圖書之印又有庫記半印晉府者明嗣晉王朱鍾
鉉也晉憲王之子正統七年以榆林王進封今爵

周易經傳二十四卷

明刊本

程朱傳義

此書卷帙次序悉同明吉澄刊本惟經文傳及本義均接刻不
提行傳則圓規標白文傳字本義則橢圓規標白文本義字每
半葉九行傳本義夾行每行均十七字

郭氏傳家易說十一卷

盧校三單本

宋郭雍撰

雍字子和洛陽人父忠孝受業於程子著兼山易解靖康中爲
永興軍路提刑死難遺書散亡雍南渡後隱居峽州著爲此書
一本忠孝之說故以傳家爲名其書剖析義理與程傳相似此

十一卷與宋志合聚珍版既刊是書又命浙江廣爲刊行卽三單本也盧抱經學士重加校正學士名文昭字召弓又號樂齋餘姚人仁和籍乾隆壬申一甲第三名進士官至翰林院侍講學士生平博究經史尤精校勘凡古書偏旁脫誤無不一一鉤摘參訂務求至當所校正書流傳甚多世稱善本焉年七十九卒

復齋易說六卷

舊鈔本

宋趙彥肅撰彥肅字子欽嚴陵人宋宗室子兒時端重如成人年十八第進士掌甯國軍書記以精敏稱終於甯海軍節度推官當時目爲復齋先生者也易說六卷朱子寓書嘉其用意精密而嘉定辛巳門人喻仲可識以傳之郡守莆陽許興裔刊而跋之興裔稱其體察精推研審深窺文象之變仲可則曰探賸鉤深簡嚴精切他人千百言不能該者約以數語蓋卓然可傳

云云通志堂曾刊入經解此則精鈔本也

楊氏易傳二十卷

明刊本

宋寶謨閣學士慈谿楊簡敬仲著

前有南京吏部尙書蔡國珍序云封司劉君功司陳君刻楊敬仲易傳成屬序楊氏因易之理以發摭其所學精深融貫要在一而能通示人專事內而不外非直探本原者能之乎劉廬陵人名昇楊豫章人名道亨也朱氏經義攷載慈湖易解十卷殆後人重分卷第故書名亦異簡爲乾道五年進士宋史道學有傳其學出於陸九淵故說易略象數而談心性多入於禪朱子作儀禮經傳通解不刪鄭氏所引讖緯之說謂存之正所以廢之 四庫著錄亦猶是意云是書前無刊本惟此刻爲祖耳

誠齋先生易傳三十卷

明嘉靖刊本

宋寶謨閣學士楊萬里廷秀著

前有宋臣僚請鈔錄易傳狀又楊承議申送易傳狀中云前權道州軍州兼管內勸農營田事楊長儒准本州公文備准省劄照對先父生前所著易傳蓋自淳熙戊申八月下筆至嘉泰甲子四月脫稿閱十有七年而後成書約十五萬字乞繕寫申發又前後自序又嘉靖壬寅開州王崇慶朔野尹耕重刻兩序版心刊癸鶴亭三字誠齋吉水人韓侂冑召之不起開禧間聞北伐憂憤不食卒事蹟具宋史是書大旨本程氏而參引本傳以證之後儒深不滿其書乃講學家門戶之見有景武堂徐氏孝重藏書樂意軒吳氏藏書諸印

厚齋易學五十二卷

鈔本

宋馮椅撰

前有嘉定十年丁丑夏五辛卯既望草塘馮椅自序二篇椅字儀之號厚齋都昌人宋史馮去非傳父椅家居授徒所著易書

詩語孟輯說等二百餘卷多不傳惟易說尙散見永樂大典中
館臣釐爲輯注四卷輯傳三十卷外傳十八卷輯注惟解彖象
輯傳則以彖象爲經而十翼爲傳外傳則以十翼爲經各附先
儒之說而斷以己意此書卷帙繁重聚珍既未版行鈔錄更屬
罕見兵燹之後巨帙完整可作宋本觀也

周易經義二十卷

鈔本

宋易祓撰

是書理數兼該折衷眾論每卦先括爲總論復於六爻之下詳
爲詮釋於經義多所發明南宋館閣錄載祓字彥章澤州甯鄉
人淳熙間上舍釋褐出身慶元間除著作郎知江州齊東野語
則載其諂事蘇師且由司業躋擢左司諫師旦敗貶死人不足
重書亦漸湮經義攷注曰未見館臣從大典中輯出近湘南亦
有刊本不及此本之全

秦軒易傳六卷

影東瀛寫本

錢塘何夢華舊藏

宋清源李中正伯謙撰

後有嘉定上章執徐十一月廣川董洪跋云秦軒先生以易鳴吾邦久矣遊從每聽講輒鈔錄然僅得一二今其書編次已就緒凡卦爻之義皆於六畫中求之真有得三聖之心而非區區訓詁之末洪粉榆晚後喜其梓成於是乎書每卷末有迪功郎福州福清縣尉李舜舉編集迪功郎漳州龍溪縣尉李熙績校正二條宋史藝文志及諸家書目均不載日本人以活字擺印阮氏元得而影寫進呈內閣乾卦九三以上與觀卦詳見羣經室外集提要夢華主簿在文達幕中轉又影寫此耳有嘉慶甲子後所得書何元錫印二印元錫字敬祉號夢華又號蝶隱錢塘人候選縣主簿精於簿錄之學家有蝶影園儲藏多舊書善本著有秋神閣詩鈔

藏書志卷一

十

西谿先生易說十二卷

鈔本

是書爲宋李過撰過字季辨興化人前有序說後分上下經依文講解不及繫辭以下西谿晚年喪明冥心默索不能與師友相訂正意所獨造每發前人所未發成書在慶元戊午間幾二十年之功也

周易要義二十卷

舊鈔本

右宋臨邛資政學士魏鶴山了翁所撰九經要義之首也所錄雖主於注疏釋文而採掇謹嚴別裁精審可謂翦除支蔓獨顯菁華者矣明萬厯間張萱重續內閣書目載九經要義內周易二冊始卽此本而方回桐江集有周易集義跋云鶴山先生謫靖州取諸經注疏摘爲要義又取瀛洛以來諸儒易說爲周易集義是要義外尙有集義今則不可尋求矣

周易詳解十六卷

舊鈔本

宋李杞撰

前有嘉泰癸亥六月望日謙齋居士李杞子才自序云文中子曰易聖人之動也於是乎用之以乘時矣夫時變之來无窮而易之理亦與之无窮善用之吉不善用之則悔吝古之聖人所以周流變化而前民之用者皆用易之妙也故以用易名編焦氏經籍志作周易詳解者誤也原書二十卷久佚館臣從永樂大典錄出編爲十六卷僅闕豫隨无妄大壯睽蹇中孚及晉卦後四爻此乃館中底本上鈐翰林院印改正點補猶可見當時治書法制按杞眉山人既非烏臺詩案中與東坡相唱和者亦非朱子之門人也

易象義十六卷

舊鈔本

愛日精廬藏書

宋丁易東撰

首有論例一卷自述撰著之目前後自序凡三篇書之大意在

本象以明義故曰象義取義之例凡十有二大抵以李鼎祚朱震二家爲宗而卦變則取朱子變卦則取都絮沈該筮占取朱子蔡淵馮椅亦不偏主於二家易東字漢臣武陵人仕至太府寺主簿兼樞密院編修官入元不仕教授鄉里以終是編諸家著錄多作十卷朱氏授經圖作十一卷焦氏經籍志作十四卷殆一兼論例一併兼大衍索隱耳館臣錄自大典張金吾又鈔自文瀾閣全書有祕冊張月霄印愛日精廬藏書三印並采入藏書志中

易學啟蒙二卷

明刊本

新安胡方平通釋永嘉朱謚述解

按方平字師魯號玉齋婺源人發明朱子易學啟蒙蓋方平學出於董夢程董出於黃幹幹爲朱子婿故方平及其子一桂皆篤守紫陽之說所採蔡淵等六家又皆朱子門人蔡模乃淵子

徐幾翁詠又淵之門人所謂一家之學也前有朱子原序題清
熙丙午暮春雲臺真逸手記卽朱彝尊誤爲方平自序也此書
前有劉涇序及熊禾跋書中凡通釋夾行低二格述解夾行低
三格每半葉十二行每行二十字當卽朱氏原刻本 四庫既
未著錄竹垞經籍考注曰未見此本銀槧精工紙墨古雅尤可
珍愛每冊有金昊之印孔昭氏白文二方印

周易本義附錄纂注十五卷

元刊本

汪魚亭藏書

新安後學胡一柱

是書以朱子本義爲宗取文公集及語錄之說易者附之則曰
附錄又纂諸儒之說足翼於本義者則曰纂注各有陰文以別
之元槧極精惜僅存彖上下傳繫辭下傳至末凡十卷闕上下
經象上下傳繫辭上傳五卷有雲間徐地東海郡圖書印張子
望印張子望文房印慎獨齋前北李氏諸圖記當爲明代收藏

家也通志堂經解中有此書其圖錄卦序圖卦互體圖易十翼
論文言辨本義啟蒙論原缺之字卽此帙紙敝字滅之處當時
卽據此以登木者也康熙間已無別本可補流傳之稀益可貴
矣更有汪魚亭藏閱書印魚亭名憲字千陂錢塘人乾隆乙丑
進士官刑部員外郎性耽著書有求售者不惜豐價購之家有
振綺堂藏書爲乾隆中吾杭之冠

易學啟蒙翼傳四卷

精鈔本

元胡一桂撰

前有皇慶癸丑歲一陽來復之日新安後學胡一桂庭芳自序
稱去朱子纔百餘年而承學漸失如圖書已釐正復有仍劉牧
之謬者卜筮之數灼如丹青復有祖尙元旨者因於本義附錄
彙疏外更輯是書因其父方平作易學啟蒙通釋故曰翼傳凡
內篇三皆闡發朱子占筮圖書之說外篇一皆雜論易學之支

流此書寫極精工圖亦清整可寶也

勿軒易學啟蒙圖傳通義七卷

舊鈔本

建安後學龜峯熊禾去非述

前有至正癸巳仲秋曾孫熊玩序曰朱子宗邵子之傳合程氏之說作本義啟蒙而易道復明迨朱子既沒未百年而當時學者寢失其真曾祖勿軒憂之復著通義四篇以承其統末又附以古人占法以見隨時變易之義陳蒙正曰朱子孔子之孝子勿軒可謂孝於朱子者矣信夫先祖著述如五經四書訓釋固多傳於世者惟此篇未及玩叨登第任將樂令恐久而湮沒遂畱梓於龜峯書院按禾建安人宋咸淳進士邵武軍司戶錢大昕元史藝文志但著熊禾易說而無卷數與此名亦不合四庫亦未錄存洵罕觀之祕籍矣

易纂言十卷

惠校通志堂本

吳澄學

四庫目錄云澄於諸經多臆爲竄亂惟此經所改大抵依據先儒較爲有本其注釋經義亦詞簡而理明此通志堂刊本也後有惠定宇手跋三條都有未滿之詞定宇名棟號松崖元和諸生乾隆十六年以經學徵惠氏世代傳經至學士而大至徵君而精爲乾隆中經學大師於易禮尤精

易原與義一卷周易原旨六卷

鈔本

洛陽後學保八述

按保八今改作寶巴字普庵色目人居洛陽前有進太子箋結銜稱太中大夫前黃州路總管兼管內勸農事任士林序稱貳卿寶公不知終於何官千頃堂書目稱舊有方回牟燾二序今惟燾序存焉又自序云余三十年有志易學非不能馳驅祿仕懼學未至不敢中道自輟持誠敬心株守斗室取諸家易書置

於座右日積月累若存有見焉是書原名易體用分三種今佚周易尙占三卷僅存其二大旨皆祖述程朱

周易本義通釋十二卷

明嘉靖刊本

祁氏淡生堂曹氏倦圃藏書

新安後學雲峰胡炳文撰掌祠九世孫珙校

前有延祐丙辰胡炳文仲虎父自序蓋仁宗之三年也雲峰婺源人嘗爲信州道一書院山長再調蘭溪學正元史有傳生平篤志朱子之學是書皆折衷本義復採諸說以相發明原本殘闕九世孫珙雜採他書所引舊說補完別輯雲峰文集中易義一卷嘉靖元年知邵武府事新安後學潘旦命鄧教諭杞校而傳之並有其前後撰序九世孫珙亦有後序有淡生堂經籍記曠翁手識曹溶之印潔躬鉅菜翁諸印溶字潔躬又字秋岳號倦圃晚號鉅菜翁秀水人崇禎丁丑進士入國朝爲戶部侍郎著有靜惕堂書目又古杭馮氏藏書雲樓子中三印名雖無

攷曾爲杭人舊藏者也

學易記九卷

明鈔配本

毛子晉藏書

元李簡撰

前有中統建元庚申秋日信都李簡自序稱己未歲承乏倅泰安山城事少取向之所集學易記重加去取洵非苟作者矣所採自子夏易傳以逮張特立劉肅之說凡六十四家各標姓氏且注兼採某某之說大抵仿李鼎祚集解房審權義海之例歟通志堂從李中麓家藏本付雕後得元槧惜未校正修版是書半爲汲古閣舊鈔有毛晉私印汲古主人兩印晉初名鳳苞字子晉常熟人性嗜空軸湖州書舶雲集於門前後積至八萬四千冊構汲古閣目耕樓以庋之其鈐書冊之印曰毛氏祕篋審定真迹曰毛氏藏書曰東吳毛氏圖書曰汲古閣世寶曰子孫永寶曰子孫世昌曰在在處處有神物護持曰開卷一樂曰筆

研精良人生一樂曰旅谿曰弦歌草堂曰仲雍故國人家曰汲

讀易攷原一卷

精鈔本

元蕭漢中撰

按漢中字景元泰和人是書成於泰定中凡三篇一論分卦一論合卦一論序卦不攻序卦傳而亦不用其說大旨雖亦出陳邵而推衍頗有精理卷後論三十六宮陰陽消長之機以互明其義明初朱氏升作周易旁注始采錄其文并節縮上下經二圖以廣其傳則是書尙非全屬漢中編著今升書殘闕而漢中書反附以得存此卽從升書中錄出者也

周易圖說二卷

精鈔本

元錢義方撰

義方字子宜湖州人嘗登進士第前有至正六年四月甲子自

序上卷圖說下卷演義凡二十七圖大率陳搏邵雍之餘緒其中所謂繫辭兼言河圖洛書乃言其理相通非據洛書以作易又謂陳搏因易而演圖非伏羲據圖以畫卦洵爲確論經義攷作一卷恐傳寫之誤

周易爻變義蘊四卷

鈔本

天台陳應潤注釋

前有至正壬戌中順大夫祕書少監致仕金華黃潛序云天台陳澤雲獻肅公邦彥先生之後學有家傳延祐間余丞甯海出示野趣之什予昂趙公嘗序之又數年余爲越上監運澤雲調明幕出示詠史之什伯長袁公爲之序嘗曰余欲著爻變易蘊非二三年靜坐不能也去年余丐老金華澤雲調桐江賓幕時登釣臺坐羊裘軒卧山高水長開汲泉煮茗洗胸中之不平若有神助幸易蘊粗完二三十年勤苦之志一旦有成云應潤更

有自序大旨謂王弼注近老莊虛渺之談陳搏圖乃參同契爐火之術周子太極圖別自一家之說皆不可以釋易其所注六十四卦爻變卽衍左傳某卦之某卦之古義其謂一卦可變六十四卦亦焦京舊法也

周易傳義大全二十卷

明內府刊本

明永樂十二年十一月甲寅命翰林學士胡廣侍講楊榮金幼孜脩五經四書大全十三年九月告成成祖親製序冠之卷首同時預脩者尙有翰林編修葉時中等三十九人此其五經之第一部也朱彝尊經義攷謂廣等就前儒成編雜爲鈔錄而並去其姓名易則取董楷董真卿胡一桂胡炳文四家此外諸書未寓目者至多蓋董楷與二胡皆篤守朱子之說董真卿則以程朱爲主而博采諸家以翼之其說頗爲賅備取材四家雖不免守賸抱殘要其宗旨尙不失正且二百餘年以此取士一代

之令甲在焉前列序例綱領目錄并引用先儒姓氏

周易通略一卷

明鈔本

翰林檢討後學豐城黃俊述

前有天順丁丑冬十月黃俊熙彥自序云予嘗助教國學諸生從予講明既授以四書會要及作文法閒有未能融會貫通者予遂編集聖賢成說以訓之易凡三十三條設爲難疑答問辨其同異名曰通畧尙有書詩春秋禮記則已佚矣有戴宏壽印

九兩印

讀易餘言五卷

明刊本

相臺崔銑學子汲編錄

書凡上下經畧二卷大象說繫辭輯說卦訓各一卷大旨以程傳爲主而兼採王弼吳澄之說與朱子本義頗有異同蓋舍象數而闢義理者也惟點鼠說卦芟除序卦文言不免蹈改經之

嫌前有嘉靖庚子冬自序鈍字仲冕安陽人宏治乙丑進士累官南京禮部侍郎明史有傳

周易贊義七卷

明嘉靖刊本

宋竹垞藏書

谿田馬理著

前有嘉靖三十五年朱睦㮮序云谿田先生自鄉寺謝歸雅志著述謂易爲六籍之原發凡起例博求諸儒同異得十萬餘言公以經術飾吏事蓋有合於是編者特爲表章云又有鄭綱序及理自序理字伯循三原人正德甲戌進士官南京光祿卿明史有傳是書先爲門人龐俊繕藏繼爲鄭炯付梓惟序稱十七卷而此僅七卷所闕止繫辭下及序卦說卦雜卦等傳不應尙有十卷或刻時歸併者歟竹垞著經義攷卽據是本未可以殘闕少之耳

讀易述十七卷

鈔本

玉笥山人潘士藻去華父輯

前有萬歷丙午瑯琊焦竑序稱去華列心孔孟之學晚獨研精於易仰思有得時時私草其事博攷前聞精思其義而折衷焉大氏王主理而莫備於房審權鄭主象而莫備於李鼎祚乃裒而擇之順而圓之補不足表未明以指南來學而引之勝地可不謂勤乎去華不幸疾歿子師魯輩不以自私梓而公諸同好云其書引房書者多於李書蓋李主象漢學之遺房主理宋學之總可以驗其所主之學矣士藻一號雪松婺源人萬歷癸未進士官尚寶卿事蹟附見明史李沂傳

周易古象通八卷

明刊本

建溪魏溶述

溶字蒼水松溪人萬歷甲辰進士官至右僉都御史巡撫湖廣是書前有黎陽王在晉序首列明象總論八篇大旨謂文周之

易卽象著經孔子之易以理明象因於漢魏晉唐諸儒所論象義取其近正者錄之名曰易義古象通蓋卽象以見義也

像象管見五卷

明刊本

明毘陵錢一本國端著

是書卽卦爻以求象卽象以明人事篇實近理遠勝前著之象鈔前有萬厯甲辰自序與序測例畧及吉水鄒元標撰序有以此洗心退藏於密及胡印西安諸印

周易孔義三卷

影鈔明刊本

梁溪高攀龍著

案攀龍字雲從萬厯己丑進士官至左都御史贈兵部尙書謚忠憲明史有傳前有壬戌冬月自撰易簡說云其知易知其能簡能易簡而天下之理得又有孔義自序云易以孔義明孔義又以易明以目前事故不易見然以目前事初非難見也蓋一

書而兩名也每條詮解易義不過數言主於學易以檢心非引易以歸心並有門人華允誠及其姪世泰兩跋

學易枝言四卷

明刊本

京山郝敬學男洪範錄

敬字仲與京山人萬厯己丑進士歷宰縉雲永嘉二縣擢禮科給事中謫謫終於江陰知縣明史附見李維楨傳所著九經解存目有周易正解二十卷易領四卷此書白序云中心疑者其辭枝余學未忘疑道其實而已卷一爲易理易數陰陽動靜五行卷二爲人身易畫易卦易象易學卷三四則附吳興鮑觀白博士易說也按四庫存目提要易領卷前標山草堂集第二謂所著經解皆編人文集是爲集中之第二種今枝言前亦標山草堂集第四則易學尙不止此矣

新刊浙江餘姚進士白川諸先生秘傳易學講義九卷

明刊本

辛未進士白川諸大倫著弟文元巽齋諸大本解元紫橋諸大圭校

前有萬厯甲戌賜進士第國子監祭酒四明余有丁序云國朝以經學造士有通一經以上者得借賢科以進然易義尤爲五經之首今之學易者非談元揆奇卽尋章摘句易道之不明久矣姚江諸氏理齋君以明易奪魁士皆宗之理齋之後有南明君大魁天下白川紫橋兩君魁吾浙省由是天下之稱諸氏者益彬彬然盛矣然其說徒祕一家也錦溪饒氏求得之出示於余序而梓之其書按節逐句解義爲科舉之捷學似麻沙坊刻四庫亦未著錄

兒易內儀以六卷兒易外儀十五卷

明刊本

明上虞倪元璐著

是書內儀以專以大象釋經每卦列卦爻辭至大象而止以六

十四卦大象俱有以字以之爲言用也故以名書卷前有內儀以說內儀以或問兩篇外儀則有原始正言能事盡利曲成申命六目而又別爲小目以紀之皆取繫辭中字義名篇篇各有圖其名兒易者蓋取孩始之義而門人王鯤前跋云先生兒易成天下以爲倪氏易漢兒干乘本作倪先生說易又何不可謂之倪氏易也元璠字玉汝天啟壬戌進士歷官戶部尙書翰林學士崇禎甲申殉難國朝賜諡文貞當時髮危傷亂借易抒意固不必盡繩之以經義矣

周易兼兩九卷

鈔本

錢塘倪璠魯玉撰

是書首曰論三古易次曰易含三義附錄周易本義八論三曰總論二十九卦四曰論易律度五曰論易歷數六曰正易正法辨誤七曰反說成長說八曰筮儀九曰廣師春十曰廣說卦大

抵發明占筮之義爲漢學之支流雖雜用緯書而推闡詳明由此而讀漢儒易注洵有裨益題曰兼兩者以易雖占人事兼仰觀俯察爲義蓋取諸繫辭語也惟據序尙有周易天象賦一篇此本無之殆傳寫者脫佚耳璠別有庾子山集注爲四庫著錄

周易洗心九卷

舊鈔本

北平黃氏藏書

荆溪任啟運小傳

啟運字翼聖雍正癸丑進士官至宗人府府丞是編大旨謂讀易者當先觀圖象故首卷備列諸圖自序論語之五十學易實卽指河圖之五十立論殊爲新奇然其詮釋經義則多發前人所未發大抵觀象玩辭時闢精理不盡從圖書生解此本疑是原稿經館臣校改卽爲四庫底本故卷前有翰林院印又有北平黃氏萬卷樓圖書印萬卷樓者大興黃崑圃侍郎藏書之

所也侍郎名叔琳康熙辛未第三人及第官至浙江巡撫落職起復詹事加侍郎銜乾隆辛未重赴瓊林

周易類經二卷

鈔本 何夢華藏書

仁和臨江鄉人吳穎芳著

是書不全載經文惟就有所解說者發揮義理闡明人事未嘗穿鑿文象亦不專尚訓詁洵宋儒之學也先生字西林隱居東鄉嘗著說文理董惜未刊行王侍郎昶有家傳府志入文苑傳此爲何夢華主簿從稿本錄出者有何元錫印白文方印

易說存悔二卷

傳寫本 邵二雲藏書

錢地汪憲撰

憲仕履見前是書謂學期窮過欲過之寡惟在知悔悔存而凶與吝漸消可日趨於吉故以存悔顏其齋因以名其易說前有擬議引六則有邵氏二雲正定經文印二雲名晉涵號南江餘

姓人乾隆辛卯進士官至翰林院侍講學士湛深經史爲錢竹汀入室弟子又有鳴野山房印鳴野山房者山陰沈復燦霞西藏書之所也

周易纂不分卷

精鈔本

惠定宇洪稚存藏書

梁溪鄒烈承揚撰

烈金匱人雍正十三年舉人見光緒無錫金匱縣志選舉表仕宦事實均無攷是書以程氏易傳朱子本義爲主而於漢唐及宋元明儒之說採其所長以附益之不專談義理又不墨守象數說經最爲純粹其對卦六圖本胡氏雙湖之說而推闡之亦有至理亦異乎消息旁通鑒空附會者矣蓋其時漢學之風尙未大著故說易不偏於康成仲翔此書錫金二縣合志經籍門未收是常州亦無傳本每册有惠棟之印白文方印定宇朱文方印棟說易爲乾隆諸儒之冠而亦寶藏是書足爲說易家之

祕笈矣卷首又有洪亮吉印白文方印按亮吉字稚存號北江陽湖人乾隆庚辰一甲第二名進士官翰林院編修

讀易小傳一卷

舊鈔本

何夢華藏書

華川馮李驊撰

前有自序曰先師云居則觀其象而玩其辭辭有理有文文有畫有音理深談何容易點畫音韻有可言者驊反復玩索窺見一斑兩經十傳元本有韻亭林顧氏易本音舉之甚疏且有全闕者今既詳注本文而試述其畧則有倒誤之文有傳譌之字有失讀之句有久晦之叶有讀若之例凡八十餘條皆音義疑險而證據明確者摘錄呈政其或未盡異時更當審定之也按李驊字天閑錢渠人與定海陸浩同編左續其書罕有知者何夢華獨鈔傳之有高學治叔荃二小印

周易虞氏消息二卷

原刊本

陳扶雅藏書

張惠言學

惠言字皋文武進人嘉慶四年進士官翰林院編修卷尾有道
光壬午春社日徐松手記云治虞氏易非先讀消息不明故皋
文前輩既成此書自加點定陳君扶雅藏其舊稿嘉慶戊辰歲
余借得錄之既而于役南湘謫居西塞越十載而歸京邑扶雅
適公車北上重讀是編深用惘然按松字星伯大興籍上虞人
嘉慶乙丑進士官翰林編修改內閣中書扶雅名善仁和舉人
爲舉文編修之門人儀徵阮文達實編修座師於其歿也命扶
雅刊其遺書因爲後序曰先生初爲鄭氏禮既復學易博求眾
說於李氏集解中得虞仲翔注潛心探索三年乃通其要領成
虞氏消息此則最後定本也

乾坤鑿度二卷

明范氏刊本

是書爲易緯之一上卷論四門四正取象取物以至卦文蓍策

之數下卷論坤有十性而推及於蕩配陵又雜引諸緯之文殊
不易曉永樂大典中亦輯出此書茲爲天一閣范司馬欽所刊
周易乾鑿度二卷 盧見曾刻盧文弨校本

鄭氏注

是書爲易緯之一種舊題鄭康成注唐以前說經家多相引用
其太乙行九宮法卽後世洛書所從出乾隆丙子盧見曾得嘉
靖中錢叔寶藏本不失舊觀梓而行世盧文弨又加校正有弓
父手校及精校善本得者珍之諸印

周易乾鑿度二卷

明范氏刊本

漢鄭康成注明范欽訂

此爲明嘉靖間天一閣范氏校刊二十種奇書之一其中缺字
皆作方口不及盧刻盧校之善

易緯稽覽圖二卷

鈔校本 丹鉛精舍勞氏藏書

稽覽圖者鄭康成所注易緯之一也世人無傳館臣鈔自永樂大典中刊布以惠後學錢大昕曰此書首言甲子卦氣起中孚卦氣之法以坎離震兌四正卦主春夏秋冬爻氣餘六十卦卦各主六日七分始中孚終頤而周一歲之日大指卽說卦傳帝出乎震一章之文而推衍之其以風雨寒溫驗政治得失亦與洪範五行相爲表裏漢人引此書者或稱中孚經或稱中孚傳或稱易內傳或稱易傳蓋七十子之微言間有存者而術士迂怪之說亦頗雜其中要其精者足以傳精義其駁者亦足以博異聞窮經嗜古之士宜有取焉此鈔本爲嘉定錢漑亭塘重校定何氏夢華所傳鈔勞氏巽卿所珍藏均有名印塘字學淵號漑亭嘉定人乾隆四十五年進士官江甯府學教授巽卿名權號平甫仁和諸生生平精校讎之學其藏書之所曰學林尤工

藏書志卷一

三

三墳一卷

明范氏天一閣刊本

右書分山墳氣墳形墳爲別山墳者言君臣民物陰陽兵象謂之連山是爲伏羲之易氣墳者言歸藏生動長育正殺謂之歸藏是爲神農之易形墳者言天地日月山川雲氣謂之乾坤是爲黃帝之易各衍爲六十四卦而繫之以傳前有毛漸正仲序謂元豐七年奉使西京歷唐州之泌陽寓於民舍得之閒出以示好事往往指爲僞書世人徒以漢時已亡非後世之宜有然尙書當初重購而莫得武帝時方出於屋壁間詎可遂爲僞哉晁氏陳氏書志並載之此爲天一閣主人范少司馬欽訂刊四庫附於存目

右易類

經部二

尙書注疏二十卷

明閩刊本 得二居萬氏藏書

漢孔氏傳唐孔穎達疏

宋槧正義每半葉十行每行大字十八小字二十四此本每半葉九行每行大小均二十字行款雖更字句仍依十行宋本毛氏汲古閣所刊卽由此出阮氏所刊十三經亦據以校勘有得一居藏書印

洪範口義二卷

精鈔本

宋胡瑗撰

簡明目錄云原本久佚今從永樂大典錄出是書發明天人合一之旨歸其要於建中出治定皇極爲九疇之本勝於劉向諸人借聖經而演祿祥也

東坡先生書傳二十卷

明刊本

晁公武讀書志稱熙甯以後專用王氏之說進退多士此書駁異其說爲多今新經尙書義不傳無從攷其同異就書而論坡

公究心經世之學明於事勢又長於議論於治亂興亡披抉明暢較他經獨爲擅長雖洛閩諸儒亦不得瑕疵其間矣宋志作十三卷萬卷堂書目作二十卷卽此刻也

禹貢山川地理圖二卷

鈔本

宋程大昌撰

按大昌休甯人宋龍圖閣學士宋史藝文志禹貢論五卷後論一卷又禹貢論圖五卷馬氏經籍攷則稱圖三十一清熙四年詔付祕閣舶使彭椿年嘗刊於泉州學宮今諸論存而圖已佚朱氏經義攷亦未之見通志堂祇刊前後論而不及圖館臣從永樂大典中錄出二十八圖僅闕九州山川實證及禹河漢河對出圖誠自明以來未覩之本也

尚書講義二十卷

精鈔本

宋史浩撰

浩字直翁鄞縣人紹興十四年進士累官右丞相事蹟具宋史
本傳宋館閣書目云清熙十六年正月太傅史浩進尚書講義
二十二卷詔藏祕府蓋經進之本順文演繹頗近經幄講章之
體大旨以注疏爲主參攷諸儒而以己意融貫之朱子嘗稱史
丞相說書亦有好處宋藝文志文淵閣書目並載其名世久書
佚經義攷亦注未見館臣從大典錄出此尙爲乾隆間全書告
成時所錄字畫端正間有夾籤校語殊可珍也

東萊先生書說十三卷

蘇九能手鈔宋本

東萊呂祖謙伯恭述門人輩豐仲至鈔

祖謙字伯恭金華人隆興元年進士復中博學宏詞科官至直
祕閣著作郎國史院編修宋書入儒林傳是編文獻通攷作十
卷趙希弁讀書附志作六卷 四庫著錄三十五卷門人時瀾
編成二十二卷又編定原書爲十三卷而此書下作門人輩豐

鈔又不出時瀾之手歸安嚴九能元照依宋本手寫其卷六末有宏治七年歲在甲寅二月花朝永口寺永智記則原書爲宋刻無疑九能前跋有云生平手錄書計四百餘卷此書最工整祕之篋衍不輟示人每卷尾雜記鈔校歲月應酬雜事惜卷九以下闕有嚴元照印香修小印元照字修能號九能歸安諸生創芳茅堂聚書數萬卷多宋元精刊著有柯家山館集

書集傳六卷

元刊本 明楊石淙舊藏

蔡沈集傳

前有書序按陳氏鱣經籍跋文有宋本書集傳跋云經文如禹謨降水儆予不作澤水變參齋栗不作齊栗益稷州十有二師不作有十秦誓無辜籲天不作籲天武成師逾孟津不作師渡金縢惟朕小子其新逆不作親迎酒誥又惟般之迪諸臣惟工不作百工弗錫乃事不作汝事君夷越我民罔尤違不作曰我

費晉弗敢越逐不作無敢皆與宋本合若堯典母歸傳引呂氏春秋增多十九字今攷定武成篇低一格無傳惟垂拱而天下治後來注十餘行異同居多又增多百餘字足以證今本之誤其爲元翻宋本無疑有內府圖書之印古吳延陵世家清河世家遂庵藏書畫記按遂庵明石淙楊一清爲中書舍人時卜居長安石門之室名有邃庵集此猶其舊藏也又有漢唐齋馬玉堂笏齋珍藏諸印

尙書集傳六卷

明正統刊本

、蔡沈集傳

張氏愛日精廬藏書志載有元至正重刊明州本凡例曰集傳舊無音釋今用鄱陽鄒氏經傳音釋附於各段之末是至正以前集傳皆不附音釋惟德星堂始附刊刻是書首蔡氏自序次纂圖六十次朱子說書綱領次孔安國書序次序悉依元版字

畫工整行款疏朗惟無明本凡例耳音釋今尙有單行本乃日本黃備昌谷碩所刊卽摘錄此書而爲之者惜乎王道音釋一書見董鼎書傳纂疏今已泯滅不獲與之並傳也

書經集注十卷序一卷

嘉靖贛州刻巾箱本

蔡沈集注

此書改集傳爲集注分六卷爲十卷與陽湖孫氏所藏元本合惟元版係黑口本附鄒氏音釋且每句加一圓讀法作連圈而此本刪節音義并削去其圈似非全依元版者後有木記楷書二行曰嘉靖癸未季春月刊行於贛州府清獻堂

洪範統一卷

舊鈔本

宣城李氏藏書

宋趙善湘撰

前有開禧三年中秋善湘自序云歐陽唐書紀災異而不言事應眉山之學亦以福極於五福不相通悉歸於皇極之建不建

嗚呼洪範果可以意離合之乎善湘竊謂漢儒離合之說非洪範之本旨遂撰洪範統一庶幾歐陽眉山之志然未知有得於箕子否善湘字清臣濮安懿王五世孫仕至資政殿大學士宋史有傳是書經義攷注曰未見館臣錄自大典者有宣城李氏瞿鋼石室闕書印記瞿硯石室者宣城李之郇字伯雨藏書之所也官郎中同治中游京師搜羅善本尤富所居有江城如畫樓文酒觴詠多一時勝流

尙書蔡傳音釋辨誤六卷

影寫元刊本

元鄒陽鄒近仁季友著

音釋本自單行德星堂刊版時併入蔡傳此從元至正間單刊本影寫者也是書雖以蔡傳爲主而糾正者正復不少故題曰辨誤江西志云鄒近仁字季友饒州人宋末爲龍陽縣丞嘗叩道於楊簡一再語而頓覺性至孝或干以利介焉弗受或告之

過歛祔以服按季友字晉昭近仁乃其大父合而題之豈祖孫同撰耶

書傳會選六卷

明味經堂刊本

明翰林學士劉三吾等奉敕撰攷明太祖實錄洪武十年三月與羣臣論蔡傳之失二十七年四月詔修是書成書則在九月觀三吾敘稱臣備員翰林屢以其說上聞乃詔天下儒士與臣等同校定之凡蔡傳之合者存之不合者改所糾正凡六十六條皆爲允愜初亦頒示天下迨永樂大全出而此書遂廢然大全之視此猶莛與楹也此書爲味經堂所刊者

尙書二卷

明刊本

吉府舊書

按首行題尙書序次行題唐陸德明云此西漢孔安國所作安國孔子十一世孫也第三行大書本文於正行以訓釋字義者細書於旁簡有疏明大旨者別作一行書之或於本文下小字

夾行版匡寬長正行開而字大旁行窄而字小每半葉正六行
旁六行蓋鄉塾課蒙之本未足爲訓詁之學梅文鼎謂明初朱
升所撰升有四書五經旁注嘉靖間程間禮重刊止存易書詩
三種餘皆散佚坊肆所行五經旁訓實倡於升而天祿琳瑯
有明刊五經句訓云不著撰人姓氏易三書二詩四春秋四禮
記六共十九卷依經直解旁注窄行前有萬厯丙申程大科序
揭銜總督兩廣兵部侍郎畧云五經旁訓舊有刻者會督學周
君應治從山東來以善本餉予遂重刻之云此書二卷與天
祿藏本合殆卽所謂句訓也朱升婺源人有周易旁注圖說及
楓林集前有吉府圖書方印又有啟淑印信新安汪氏兩印按
古黃周宏祖輯錄古今書刻黃州府下有書經旁注此當爲黃
州刊本而吉府實在長沙府此則就近收藏更可證明黃州也
吉府者明吉王朱見浚也王爲英宗第七子天順元年封今爵

啟淑字秀峯號切庵歙人官工部都水司郎中寓居杭之小粉場其藏書之室曰開萬樓藏書百厨乾隆三十七年詔訪遺書訖庵家進呈六百餘種恩賞古今圖書集成一部士林榮之

書傳大全十卷

明內府刊本

明永樂中翰林學士胡廣等奉敕撰前列凡例四條引用先儒姓氏一百三十二及奉敕纂修諸臣銜名自胡廣楊榮金幼孜以下三十九人書圖集傳序綱領書序及卷末書後序是書僅襲陳櫟集傳纂疏陳師凱蔡傳旁通兩家義理與攷核既長且備尙勝於易詩禮春秋等部有張祖鎬章配京號震齋筆研精良人生一樂三印

書傳集解十二卷

明刊本

項氏菴卷堂藏書

朱子訂定蔡氏集傳後學金城黃諫渠解

此書舊藏張氏愛日精廬其原缺僅卷六說命中白應善以動起至篇末又說命下至微子又召誥至君奭曾載之藏書志今罹兵火又缺自堯典起至大禹謨若帝之初止又益稷庶頑讒說起至篇末止又伊訓缺末節二葉又自泰誓上起至武成又自洪範五皇極起至末又周官曰唐虞稽古起至秦誓末核今之所存不及十之五矣書中所載宋元人經注今無傳書者凡四十餘家孤文隻義賴以不泯近時藏書家目錄均未之見真如麟角鳳毛爲海內希覩之本未可以不完廢矣諫字廷臣蘭州人正統壬戌一甲第三人歷官至翰林學士每卷首末有朱文項氏萬卷堂圖籍印長方印萬卷堂者明秀水項篤壽字子長藏書室也篤壽中嘉靖壬戌進士好藏書見祕冊輒令小胥傳鈔儲之又有朱文汲古閣方印白文毛氏家藏方印蓋初藏項氏繼歸毛氏者

方麓先生尚書日記十六卷

明刊本

金壇王樵著

前有萬歷乙未自序又池州青陽知縣門生蔡立身撰序前後有南昌彭燧題識其書不載經文惟按諸篇原第以次詮釋大旨以蔡傳爲主蔡傳所未備者則採舊說以補之其事迹則多據金履祥通鑑前編李維楨稱其於經旨多所發明亦可用之於科舉所著尚有書帷別託今惟傳此書有燕嘉鹿友兩印

新鐫書經講義會編十二卷

東瀛刊本

大學士申時行著

時行字汝默號瑤泉長洲人嘉靖壬戌進士第官至大學士謚文定明史有傳是編乃時行官翰林直日講時所進皆恪守蔡傳務求淺近易明此東國延寶甲寅大坂書林森本文舍堂所鐫

禹貢山川郡邑攷四卷

舊鈔本

錫山王鑑識

前有萬厯庚寅陸祥旭序云繼山先生嗣文靖先生起而成嘉靖乙丑進士先後涉丹署歷符臺而拜大鴻臚遷太僕卿畫錦歸里嘗以禹貢山川郡邑古今沿革源流異同斟酌克究之乃揭圖以示人猶慮未哲更加注釋稽其沿革辨其異同條分類析俾山川郡邑之勝一展卷而森列目前其功豈在蔡氏下哉按鑑一字汝明明史附邵竇傳經義攷未列其書

尚書疏衍四卷

精鈔本

明陳第撰

前有萬厯壬子閩陳第自序稱少受尚書讀經不讀傳注口誦心維得其意於深思者甚多因宋元諸儒疑古文僞作竊著辨論復取古今注疏詳悉讀之是者標之未安者微釋之句讀未

是者正之素得於深思者附注之質之弱侯先生云段段愜心
言言破的眞學者之指南越世之卓見遂付之梓以與古音圖
贊並行蓋第已先著伏羲圖贊也

書傳數言十卷

明刊本

懷安鍾陽馬森著

前有崇禎戊寅沈履祥序後有男欽謹識云書傳數言是先恭
敏爲諸生時所著三山故無習是經者嘉靖乙酉督學邵公銳
拔所進生內二十有八人改習之延莆田林公學道授業先公
師承其說鑽研數行浹期成帙及官大司徒明農後方付梓行
於世崇禎丙子鄰不戒於火收拾煨燼得數言若干版付際明
收藏際明汲菟補完際明眞馬氏之孝孫也書爲無錫後學秦
禾校

尚書攷異五卷

舊鈔本

明梅鷟撰

此書辨正古文尙書具有根據明史藝文志不著錄經義攷作一卷天一閣所藏不題撰人以書中自稱鷟按則爲梅氏可知原稿未分卷然斷不止一卷今從 閣鈔五卷本存之

尙書譜不分卷

明鈔本

顧千里手校

按 四庫存目尙書譜五卷明梅鷟撰鷟先作此譜因及攷異攷異業已著錄是書不分卷棉紙藍格的係明鈔兼有朱校後有顧廣圻朱筆記云凡舊校失當者今標舉正之又墨筆記云甲戌六月再校一過益歎此鈔本之善不可輕議刪改也時將爲樣刊行因細加勘定後之覽者其詳焉思適居士又記云新刊依別本補首卷各條又補末葉另記云澹生堂書目載尙書譜四卷二冊梅鷟撰此或爲祁氏舊鈔耶思適居士者元和顧廣圻也字千里號澗菴諸生精於校讐一時黃蕘圖孫淵如張

古愚胡果泉均重其人

右書類

善本書室藏書志卷一終

善本書室藏書志卷二

錢塘丁丙松生甫輯

經部三

毛詩注疏二十卷

明閩刊本

得一居葉氏藏書

漢鄭氏箋唐孔穎達疏

前有毛詩正義序題唐國子祭酒上護軍曲阜縣開國子臣孔穎達奉敕撰次詩譜序此九行本爲明御史李元陽刊於福建世稱閩本汲古閣卽從之而刊也阮氏刊注疏亦藉以校勘

穎濱先生詩集傳十九卷

明焦氏刊本

蘇氏輟以詩之小序反復繁重類非一人之詞疑爲毛公之學衛宏之所集錄因惟存其發端一言以下餘文概從刪削其自序云探其可者見於今傳其尤不可者皆明著其失於毛氏之學洵不激不隨務持其平矣世行二十卷此十九卷爲明焦氏

藏書志卷二

一

竝刊兩蘇經解本

詩集傳八卷

宋刊本

吳寬所藏書

朱子集傳

拜經樓藏書題跋記云右不全宋本止八卷經文悉與唐石經同注文悉存文公原本與陳簡莊徵君所藏相伯仲楮墨古雅字畫精楷蓋宋刻之佳者有晉府書畫之印兔牀書云按明史諸王傳晉恭王封於太原府傳至裔孫表葉孝友好文分封慶成王此豈其故物耶前錄陳簡莊跋云攷文公孫鑑詩傳遺說序云詩集傳豫章長沙後山皆有本而後山校讎最精此疑爲後山本其間經文如召南何彼穠矣作穠矣邨風終焉允臧作終然衛風遠父母兄弟作兄弟父母齊風不能晨夜作辰夜皆與唐石經合有宋本甲拜經樓吳氏藏書印簡莊名鱣字仲魚海甯人嘉慶丙辰舉孝廉方正中戊午舉人營別業於硤川購

藏宋雕元槧及近世罕見本甚夥拜經樓爲吳兔牀藏書處免牀名爲字槎客海甯貢生喜搜羅金石及宋元刊本年八十餘卒

詩經二十卷

明正統司禮監刊本

朱子集傳

卷前爲淳熙四年丁酉冬十月戊子新安朱子序次詩圖詩說次綱領次大小序亦正統間經厯刊本

慈湖詩傳二十卷

鈔本

宋楊簡撰

前有慈湖自序附樓鑰答書是書大要本孔子無邪之旨反覆發明據後漢書以小序出自衛宏不足信又謂左傳不可據爾雅亦多誤陸德明多好異音鄭康成不善作文甚至以大學之淇澳爲多牽合蓋慈湖學出陸九淵未免高明之過然攷證頗

詳歸本無邪不悖於聖人之義焦氏經籍志千頃堂書目尙載其名經義攷則注已佚館臣鈔自大典中總論列國雅頌之篇及公劉以下諸篇殘缺無從採補

呂氏家塾讀詩記三十二卷 明嘉靖覆宋本

宋呂祖謙撰此書第一卷爲綱領卷二以下釋大小傳經文博引諸家注以成之迨熙壬寅朱文公有序是本公劉首章下識云先兄己亥秋復修是書至此而終自公劉次章訖於終篇則往歲所纂輯者未及刊定今不敢損益姑從其舊乃其弟所校刊也與陳氏書錄解題合此明御史傅應臺氏刻於南昌有嘉靖辛卯冬古鄆陸鉞序每葉二十八行每行十九字經頂格注低一格注中有注旁行而字畧小不作雙行各家姓氏以黑質白文別之書法以篆作楷宋諱有缺筆蓋從宋巾箱本翻雕者較萬厯刊本卷一禮記天子五年一巡狩之前多一條卷二十

七王之職有關能下多千餘字卷二十八自彼成康奄有四方
下多十四字詳盧抱經羣書拾補中

呂氏家塾讀詩記三十二卷

明萬厯刊本

是書前有清熙壬寅九月朱子序稱少時淺說伯恭誤有取焉
既久自知說有朱安或有更定伯恭反置疑於其間方將與反
復其說以求真是而伯恭已下世云云蓋雖應其弟祖約之請
而夙見深有未化陳振孫稱其博採諸家存其名氏先列訓詁
後陳文義翦截貫穿如出一手有所發明則別出之詩學之詳
未有逾此魏了翁後序稱其能發明詩人躬自厚而薄責於人
之旨兩說已略盡所長是書有建甯巾箱本又有眉山賀春卿
蜀刻本又嘉靖間陸氏鉞屬傅某刊於南昌本此萬厯癸丑江
甯顧起元序謂南攷功陳君與寮蘇君程君授諸梓大約爲南
京吏部陳龍光伯爲蘇進瞻叔程國祥仲若其人耳祇刊陸鉞

藏書志卷二

三

序而不及尤袤與魏了翁序瞿氏田裕齋藏書記敘之最詳

毛詩講義十二卷

鈔本

宋林邑撰

宋藝文志馬氏經籍攷文淵閣書目皆作五卷朱氏經義攷注曰已佚此錄自大典者邑字仲山古田人紹熙元年特奏名嘉定中守全州九年多惠政建清湘書院與諸生講學勉敦實行是編殆守郡時所講授而門人錄之也大旨取裁毛鄭折衷異同雖範圍不出古人而融會貫通要無枝言曲說之病

詩輯三十六卷

明味經堂翻刊本

朝奉大夫臣嚴粲述

按粲字坦叔邵武人官清湘令前有竹溪林希逸序次淳祐戊申夏華谷嚴粲自序謂鋟之本便於童習次袁蒙齋手帖云黍離中谷有蕓葛藟不用舊說獨能得詩人優柔之意其他時出

新意可與言詩也已矣次條例次清濁音圖次十五國風地理圖次毛詩綱目其書以呂氏讀詩紀爲主而雜采諸說以發明之舊說未安則斷以己意而於音訓疑似名物異同最爲精覈卷中之字往往與今本不同猶存宋刻之舊明趙府居敬堂曾爲鏤行此則味經堂刊也

詩說十二卷

明鈔本

汪魚亭藏書

信安劉克學

是書宋藝文志焦氏經籍志朱氏授經圖均未載經義攷云崑山徐氏有宋雕本前有總說惜缺第二第九第十凡三卷阮氏元影鈔徐殘本進呈擘經室外集云克自序在於紹定壬辰蓋宋理宗時人宋儒說詩廢小序者朱子也尊古注者呂祖謙也克之學出於呂其子坦跋稱其書每篇係諸家之解而後繫己意坦以卷繁未易鋟梓乃刪舊解獨存克說已非克之原本鄭

風大叔于田今本脫大字與唐石經合道光初汪士鍾得宋刻
從嘉興錢夢廬假得鈔本第二一卷仿宋寫刊其第九第十兩
卷仍待延津之合今此本有汪魚亭藏閱書印非惟第二不缺
第九第十亦全道光間振綺堂藏書具存惜閱原觀察未之一
見今汪書亦散僅存藝芸精舍宋元書籍一目書之遇不遇亦
關時會豈不可慨也夫

詩攷六卷

舊鈔本

振綺堂汪氏藏書

浚儀王應麟撰集范陽盧文弼增校

玉海後附刻作一卷昭文張氏愛日精廬藏有元泰定丁卯翠
巖精舍刊六卷本題曰韓魯齊三家詩攷與玉海本頗多異同
有景定五年文及翁及延祐甲寅胡一桂兩序是帙亦分六卷
前後有應麟自序文胡二序則無之卷中盧抱經學士固多增
校此外如馮登府趙坦李富孫陳善臧鏞堂汪遠孫增注彙纂

洵善而又善也有登府手校柳東曾鞫兩印登府字雲伯號柳東嘉興縣人嘉慶庚辰進士官甯波府學教授家有勺園極水木山石之勝坦字寬夫仁和廩生道光元年舉孝廉方正富孫字香子嘉興縣學諸生著述甚多鏞堂又名庸字拜經武進人天性孝友嘉慶十六年卒年四十有五遠孫字久也號小米錢塘人憲之曾孫嘉慶丙子舉人官內閣中書

詩傳通釋二十卷

東瀛刊本

朱子集傳後學安成劉瑾通釋

按瑾字公瑾安福人其學問淵源出於紫陽大旨在發明集傳與輔廣詩童子問相同而小序未嘗置論胡廣纂大全全襲其說也元至正壬辰日新堂有刻本此則日本所刊有遷喬館之藏書印恐亦彼土藏書家也

詩傳旁通十五卷

精鈔本

元梁益撰

前有至正四年承直郎太平路總管推官致仕濱州翟思忠序
又益自識云此編不敢自謂成書不敢輒題目錄然又不可無
目錄以紀錄其事故姑類聚其目備觀者之檢閱而以類目之
云其義因朱子詩傳惟明作詩之意而名物訓詁多所未詳乃
仿孔賈作疏之例凡集傳所引故實一一引據出典辨析原委
猶陳師凱蔡傳旁通意也益字友直號庸齋江陰人其先福州
籍嘗舉浙江鄉試教授鄉里以終事蹟附元史陸文圭傳
詩經疏義會通二十卷 明刊配鈔本 吳氏瓶花齋藏書

朱子集傳後學番陽朱公遷撰野谷門人王逢輯錄松陽門人何
英增釋

前有綱領及疏義大全圖其說墨守朱子不踰尺寸亦間有辨
證書成於至正丁亥明正統甲子英始取逢所授遺稿重加增

訂付梓每卷首行末行疏義下又增題會通未喻其故公遷字
克升樂平人以至正辛巳領浙江鄉試教授金華改處州逢字
原夫明宣德初授富陽學訓導以明經召見放歸杜門講學稱
松陽先生英爲逢門人著有詩經詳釋此爲安正書堂重刊本
關卷鈔補有吳城敦復及陶世濟印小穀端履嘉慶甲戌進士
官翰林院庶吉士印蓋又入蕭山王氏十萬卷樓者也城字敦
復號甌亭錢塘人家有瓶花齋藏書甚富卒年七十一府志入
文苑傳端履字小穀蕭山人嘉慶甲戌進士官翰林院庶吉士
詩續緒十八卷

舊鈔本

元劉玉汝撰

王汝字成之廬陵人嘗舉鄉貢進士所作周霆震石初集序末
題洪武癸丑則明初尙存也是書專以發明朱子集傳故曰續
緒體例與輔廣童子問相近諸家書目皆未著錄此則傳鈔永

樂大典本也

詩演義十五卷

元梁寅撰

朱彝尊經義攷作八卷注云未見此本至小雅若之華篇止已
有十五卷以下皆闕八卷之說殊未爲確是書推演朱子詩傳
之義故曰演義隱也使顯畧也使許淺顯易見切近不支殆爲
幼學講授計也

詩經大全二十卷

高麗刊本

明湖廣等奉敕撰亦永樂中所修五經大全之一也前有凡例
四條奉敕編輯諸臣職名目錄引用先儒姓氏朱子集傳序綱
領圖二十有五詩學北宋以前皆無異說歐蘇而後漸生別解
鄭樵周孚以後爭論益起宋末黜古義立新學元延祐間行科
舉法遂定爲功令廣等羽翼朱傳遵憲典也明靖難以後耆宿

畧盡廣等無可與謀倉促應詔全抹元人劉瑾詩傳通釋而改其中愚按二字爲安成劉氏云云劉本以小序抹各篇下此則別爲一編微示不同此爲高麗國刊本較明官書尤字大紙闊存之以見東土書林之概

詩說解頤四十卷

明刊本

後學紹興季本輯鈔

是書前有嘉靖丁巳三月既望彭山季本自序凡總論二卷正釋三十卷字義八卷多出新意不襲別人而徵引賅洽亦足自申其說若改定舊說必反覆援据明著其所以然之故非似狂禪解經者也書爲門人會稽馬楫校正兵部尙書兼都察院右都御史總督浙直福建軍務新安胡宗憲所刻並撰序於首有謙甫張聲駟二印

詩故十卷

鈔本

敕理石城王府事鎮國中尉朱謀瑋字鬱儀撰

前有萬曆三十七年孟冬自序又武林黃汝亨序曰說詩大都原本小序按文武周公以來春秋左國之事而次第其世攷其習俗論其人而以意通之云云其曰詩故者則取漢儒魯故齊后氏故齊孫氏故韓故毛詩故所謂故者道其旨意也蓋深居朱邸博極羣書不藉進取故能研究遺文發揮古義浙江採進遺書尙屬刊本此則傳鈔者耳

讀風臆評一卷

明萬曆閔氏刊本

王萬士藏書

前有萬曆戊午八月望巴令荆南戴君恩忠甫自序云戊午蜀
聞予受事廉以外多暇予性不耐暇檢篋得國風半部覆舍紫
陽以臆評以臆點浣書冊而呈之直指吳公攝泉閣公爰進而
語之曰以意逆志是爲得之昔子列子御風而行非其身能御
之亦意御焉耳意者臆也吾且與子相御而遊乎十五國之間

云是書取國風加以以評又節錄朱傳於每篇之後萬厯庚申
烏程閔齊敗遇五校刊並爲後跋以朱墨版印行君恩長沙人
嘉靖癸丑進士官巴縣知縣卷前有王金銘印湛廬藏書兩印
王金銘字謫士號湛廬仁和貢生候選教諭家湖墅好藏古書
六家詩名物疏五十五卷 明鈔本

海虞馮復京嗣宗輯著

前有萬厯乙巳瑯琊焦竑撰序又序例十則是書因宋蔡卞詩
名物疏而廣之六家者齊魯毛韓鄭箋朱傳也徵引頗爲賅博
每條之末間附攷證其議論皆有根柢應京字可大號慕岡盱
眙人萬厯壬辰進士官至湖廣按察使僉事明史有傳

詩經說通十三卷

明刊本

虎林沈守正無回甫纂

前有萬厯乙卯中秋守正自序次列引用書目正引自魯申公

至胡允嘉凡三十家雜引自尙書疏至函史各書凡二十九種
凡例六則卷首一卷其說頗以朱傳廢序爲非然亦不甚用古
義大旨欲以意逆志以破拘牽守正字允中號無回錢塘人萬
厯癸卯舉人官國子監博士

詩說三卷

精寫本

東吳硯谿惠周惕

前有癸亥秋七月濟南德水田雯及邱南老鈍汪琬兩序末有
小門生王辟岐謹錄一條惠氏著作皆仿林吉人之寫精華錄
午亭文編堯峰文鈔之例屬門人精寫此則辟岐所錄之一種
也周惕字元龍長洲人康熙辛未進士由庶吉士改密雲知縣
惠氏三世以經學著實周惕有以聞其先也其書於毛傳朱傳
無所偏主惟以己意攷證引經據典所得者較多

治齋讀詩蒙說二卷

精鈔本

中鄉老農顧成志心勿氏

前有關逢敦牂壯月自序曰光祿沈敬亭先生詮易畢欲從事於詩謂余曰吾釋詩不惟其義且以法詩法備於三百篇而數有詳說其妙者童而習之皓首莫能言亦學者之恥也得一筏以津逮焉甚善無何先生病未就而三十年前先生嘗書詩簡端三百餘條竊欲取其論法者廣之卒卒未暇今課兒是經乃輯一卷名曰蒙說

讀詩小匡一卷

舊鈔本 何夢華藏書

華川馮李驊撰

自序曰三百篇之韻非可以後人之韻拘也吳氏韻補朱子以之叶詩陳氏又專有毛詩古音攷此外如韓魯以及白嚴諸家莫不各有讀法其中離合彙半驂已注有全本今先摘其尤與古人發明者五十餘條就正博雅如以爲可與言詩則全韻出

矣攷序稱全韻藁本定佚此書亦人所不知夢華主簿獨知之而錄之以存吾鄉之經學豈不重可寶貴哉

詩外傳十卷

明通津草堂刊本

于氏南樓藏書

韓嬰

前有韓嬰小傳至正十五年龍集乙未秋八月曲江錢惟善序稱海岱劉侯貞來守嘉禾聽政之暇因以所藏諸書悉刊郡庠云云宏治後歷下薛來新都唐琳吳人蘇獻可及周廷案先後傳刊此則沈辨之通津草堂原刊初印也其書雜引古事古語證以時辭與經義不相比附所述多與周秦諸子相出入卷前有周禮之印拙庵一樂齋何氏心遠堂珍藏書畫之章何氏藏書經囊印端書于氏南樓藏書允良諸印于允良星子人曾刻稽古樓巾箱本十三經者

右詩類

經部四

周禮注疏四十二卷

明開刊本

得一居葉氏藏書

漢鄭氏注唐賈公彥疏陸德明釋文

前有唐朝散大夫行太學博士宏文館學士臣賈公彥等奉敕
撰正義序次序周禮廢興按隋書經籍志鄭注作十二卷賈疏
文繁乃析爲五十卷新舊唐志並同今本四十二卷不知何人
合併朱子語錄稱五經疏中周禮疏最好朱子深於禮故能知
鄭賈之善朱槧余仁仲本周禮經注每卷末分記經注音義字
數阮氏校勘記云附釋音周禮注疏每葉二十行每行十七字
注疏夾行每行二十三字因兼載釋文故稱附釋音因每半葉
十行故今稱十行本以別於閩監毛注疏本內補刻者極惡劣
凡閩監毛本所不誤者補刻多誤然則此九行未必不勝於十
行矣卷前有得一居珍藏印

周禮新義十六卷附攷工記解二卷

鈔本

陳仲魚校藏

宋王安石撰

晁氏讀書志曰熙甯中置經義局撰三經義皆本王安石經說周禮新義原二十二卷明萬厯內閣書目尙載其名朱彝尊經義攷注曰未見今本出於大典編爲十六卷蔡條鐵圍山叢談云王元澤奉詔爲三經義時王丞相爲之提舉詩書多出元澤手周禮實丞相爲之筆削者筆蹟如斜風細雨誠介甫親書云云安石雖以周禮誤宋然惟訓詁字義頗爲穿鑿其餘發揮經義尙不失爲儒者之言攷工記解則鄭宗顏韞安石字說所補也有仲魚手校一印

王昭禹周禮詳解四十卷

舊鈔本

盧抱綱藏書

唐國子博士吳縣開國男陸德明釋文附

前有王昭禹光達自序又周禮互注總括十五則陳振孫書錄

解題昭禹未詳何人據王與之周禮訂義類編姓氏世次當爲
徵欽時人其書闡發經義頗有注疏所未及者周禮訂義多採
其說未可以宗新學廢也附載陸德明釋文而卽以德明之名
冠卷首或後人以德明時代在前遂增題於上歟有虎林盧文
弨寫本錢唐抱經堂藏汪氏振綺堂藏書三印

禮經會元四卷

元刊本

怡府藏書

宋龍圖閣學士光祿大夫贈開府儀同三司南陽郡開國公食邑
二千一百戶實封一百戶諡文康葉時著

文康公字秀發錢塘人淳熙甲辰進士歷官顯謨閣學士知建
甯府政成歸老與紫陽朱文公友善尤粹於周禮晚居嘉興著
禮經會元授門人三山翁台學者稱竹塹先生前有至正二十
六年丙午後學陳基序云文康公取經文之所存者蒐羅彙括
曲暢旁達事覈理當如指諸掌其補亡一篇又皆以經補經盡

洗漢儒附會之陋公裔孫今浙江儒學副提舉廣居奉遺稿獻之浙江行中書省右丞榮陽潘公命刻諸梓且寓書俾余序其篇端後有竹垞先生傳及至正二十五年六世孫葉廣居識語廣居字居仲天資超邁著有自得齋集此書在宋時未經刊行故宋史藝文志及晁公武陳振孫馬端明諸人書目皆不載有明善堂覽書畫印信明善堂者怡僖親王於乾隆五年純廟賜額也王名宏曉號冰玉道人怡賢親王允祥子

禮經會元四卷

元刊本

汪秀峰藏書

宋葉時撰銜謚具詳前書此則印本校後惟前多至正乙巳中秋榮祿大夫江浙行省右丞兼同知行樞密院事海陵潘元明序攷元明泰州人初與張士誠俱起鹽徒爲浙江行省右丞守杭州李文忠下餘杭元明獻城士誠勢益孤乙巳乃元順帝二十五年次年丙午卽陳基作序之歲是冬元明已降於明距書

成未逾歲也有新安汪氏啟淑印信圖記按是書撰者獻者皆杭之鄉先達梓者爲守杭之故官序者爲寓杭之高士陳基寓杭之觀巷舊藏者又杭之寓公今又歸之寒家五百年流轉之緣信非偶然

太平經國之書十一卷

明嘉靖山西刊本

葉氏萊竹堂藏書

永嘉鄭伯謙節卿

前有自序題修職郎衢州府學教授永嘉鄭伯謙撰卷之首列成周官制秦官制漢官制漢南北軍四圖爲目三十大約借周禮以抒論取劉歆周公致太平之迹語故名曰太平經國之書嘉靖丙申山西左參政祥符高叔嗣序刊於山西布政司有葉氏萊竹堂藏書圖印萬卷樓藏書記方印萊竹堂者明崑山葉文莊公藏書處也公名盛字與中正統乙丑進士官至吏部左侍郎藏書之富甲於海內雖服官邊徼必攜鈔胥自隨每鈔一

書成輒用官印識於卷端其風流好事如此事迹其明史本傳

周官總義三十卷

鈔本

宋易祓撰

趙希弁讀書附志載有此書云許儀爲之序刊於衡陽世久遺佚館臣錄自大典並採王與之周禮訂義所引舊文以補其地官夏官之闕仍依原舊卷數已十得八九矣祓研索經文斷以己意與先儒舊說雖有異同然多引經證經較之鑿空有間不可以人品卑污而掩其著書之功也

周禮句解十二卷

明嘉靖刊本

魯齋朱申周翰

前有嘉靖丙辰春賜進士出身資善大夫奉敕總督漕運兼巡撫鳳陽等處地方都察院右副都御史前奉敕提督浙江學校廣陽陳儒撰序曰儒奉督撫淮南亟欲崇尚古訓爲保釐之圖

適有遺周禮一帙省讀之而典則明備字畫精嚴乃檄淮守蔡子楊金刊之將以布諸學宮是集也刪繁舉要得什一於千百君子欲求帝王之治其尚毋忽於闕雖麟趾之意哉朱彝尊經義攷止載儒序第言字畫精嚴不紀其書之所自也 四庫提要按江西通志有朱申字繼宣宋太學生又淳熙十一年序李心傳道命錄之新安朱申題銜朝散大夫知江州軍事二者未知孰是此則多周翰一字或非繼宣耳范氏天一閣藏是書多校正詳增音訓六字題魯齋朱申注釋後學陳儒校刊前闕序文刊似在後矣

校正詳增音訓周禮句解十二卷

精鈔本

魯齋朱申註釋後學陳儒校刊

此書從明刻影鈔字畫精工又得盧抱經學士校正誤字尤可寶貴前缺陳儒序一篇學士手書補之鄉賢手跡令人見而生

敬卷首有武林盧文弨手校抱經堂印二方

周禮集說十二卷附復古編

元刊本

吳興後學前溪陳友仁君復編

復古編

臨川俞庭椿壽翁編

右元槧本闕卷六卷七卷十一三卷以成化張氏瑄建陽刊本
配全據四庫提要春官已缺此帙猶存提要又云序題丙子
後九歲丙子乃宋亡之歲友仁不題至元年號而上溯丙子以
系年蓋亦宋之遺民故仿陶潛不書年號但書甲子之例此刻
刪改丙子後九四字爲至正戊子距作序時相隔六十二年且
刻改痕迹顯然據友仁序曰近得集說於雪編節條理與東萊
詩記相類癸未秋攜其書以歸訓詁未詳則益以賈氏王氏之
疏說辨析未明者則附以前輩諸老之議論蓋友仁因前人舊
本重加增輯也又按錢竹汀日記有觀劉疏兩所藏元槧周禮
義疏十二卷義疏二字當爲集說之誤蓋傳錄有譌耳友仁湖

州人宋亡不仕抱節以終明張刻闕地官劉儲秀補之此獨完
善無闕尤可寶也

周禮集說十二卷

明成化刊本

吳溪後學前溪陳友仁君復編地官闕中劉儲秀編補

此書前有成化甲午巡撫福建都御史江浦張暉序原闕地官
闕中劉儲秀補之四庫未見劉補仍其舊闕此固補入第三
第四卷也

周官集傳十六卷

鈔本

元毛應龍撰

按張萱內閣書目稱應龍字介石豫章人大德間官澧州教授
原編一官四卷故合二十四卷永樂大典中缺地官夏官故止
十六卷是書於諸家訓釋引據頗博所自注者亦頗不苟宋以
來諸儒舊說藉之而存亦足以資參證

周禮傳十卷翼傳二卷

明嘉靖官刊本

前有嘉靖戊午秋日吳人王應電自序又壬子楊豫孫及念庵羅洪先永豐令楚蘄吳鳳瑞三序并嘉靖三十九年六月泰和縣奉分守道奉都察行文又四十二年六月永豐縣奉都察院行文兩件爲刊周禮傳翼以明聖經事理可見當日是書頗爲見重其傳割裂序官頗近變亂所注五官攷證亦不甚詳而發揮義理洵爲醇正翼傳七篇皆經外之餘文耳應電字明齋本崑山人嘉靖中遭倭亂避江西遂終於泰和故行文取書其僑寓之地也

周禮全經釋原十二卷附周禮通論一卷周禮通今續論一卷

明隆慶刊本

後學柯尙遷集釋并原

尙遷字喬可長樂人自號陽石山人嘉靖中官邢臺縣丞是書

前列總序一篇源流序論一篇六官目問四篇全經綱領十二條先儒姓氏攷釋原凡例七條書中稱釋者皆采輯古注也其曰原者則尙遷推闡本意也其割裂地官補冬官稍勝俞庭椿之說而隆慶四年巡按直隸御史蜀巴傳寵序之前丁未進士金壇王樵廬州知府張大忠跋其後

周禮注疏刪翼三十卷

明刊本

後學葉培恕行可定王志長平仲輯

志長崑山人萬厯中舉人明史文苑傳附其兄志堅傳中是書於鄭注賈疏多削其繁文故曰刪又雜引諸說發明其義故曰翼周禮自鄭賈訓詁攷究已屬大備雖程朱大儒亦無專書王安石王昭禹王與之葉時鄭伯謙借經抒義變攷證爲論辨鄭賈舊說幾乎從祀志長根柢注疏亦可謂研心古義者矣首列賈氏正義序周禮廢興序崇禎己卯葉培恕張溥王志慶及志

長刑翼四序凡例十一則

攷工記輯注二卷

明刊本

浙汜陳與郊輯

與郊字廣野海甯人萬厯甲戌進士官至太常寺少卿別著檀弓輯注二卷已入四庫附存此書未經採進按明林兆珂有攷工記述注二卷郭正域有批點攷工記一卷徐昭慶有攷工記通二卷程明哲有攷工記纂注二卷是書當不出四種之間耳

周禮疑義四十四卷

舊鈔本

鄭氏注賈公彥疏吳廷華存疑

按廷華字中林號東壁仁和人康熙甲午舉人榜名蘭芳官福建興化同知杭世駿榕城詩話曰東壁去職僑居蕭寺穿穴買孔著三禮疑義數十卷何元錫錄而藏之虞山張月霄從何氏

傳錄記曰 四庫全書總目曰三禮疑義今未之見則傳本之
稀可知並言是書分訂義疑義兩門訂義者取注疏及唐宋諸
家之說以訂正經義也疑義者取注疏之義有可疑者爲之反
復辨論以正鄭賈之誤也其意重在疑義故以疑義名其書猶
毛詩本義有論有本義而以本義名書也自序曰經有可據則
信之以經經無可據則信之以理至經與理俱無可據則別之
爲疑義可以知其著書之大旨矣亂後得殘本留心三十年無
可搜補重以鄉先生遺著先記於冊以待續訪存卷三至卷六
廿三至三十卅三至卅六四十一至四十二共十八卷

右禮類周禮之屬

儀禮十七卷

明嘉靖翻宋本

馮氏快雪堂舊藏

鄭氏注

首列儀禮卷第一次行士冠禮第一越三格儀禮越二格鄭氏

注又次行經文起注雙行不附音釋每葉十六行行十七字卷末夾注經幾字注幾字凡敬字缺筆而不避徽讓等字疑出於宋天聖以前本相傳爲明嘉靖間徐氏繙刻宋本三禮此其一也黃氏士禮居藏嚴州本十七卷爲宋乾道八年命張洵校刊世稱最佳之本是刻雖繙其原尙在嚴本以前卷面沈氏形題云此本一一與李如圭集釋合如鄉射禮鄭注古文而后作後非也孝經說然后曰十四字各本皆缺此本獨全凡注疏缺者此本俱有眞至寶也惠定字卽用此勘宋本陳氏鮑校跋此書凡二千言詳經籍跋文可印證也有馮氏快雪堂藏書記印曾出馮具區祭酒夢禎家尤足貴耳夢禎字開之秀水人明萬厯丁丑進士官南京國子祭酒快雪堂者祭酒寓杭築屋於孤山之麓以藏圖籍者也孫文昌字研祥諸生寓居仁和塘棲儲藏甚富

儀禮二十二卷

明刻經字本

鈕氏世學樓藏書

白文十七卷後爲奔喪禮第十八投壺禮第十九深衣第二十諸侯遷廟禮第二十一諸侯饋廟禮第二十二凡五篇乃取大小戴記以補儀禮爲逸經末有後學廬陵陳鳳梧校刊一條卷端鈴會稽鈕氏世學樓書籍印邵氏二雲印按明季越中鈕氏藏書最富國初已盡散佚見黃黎洲天一閣藏書記徧檢府志石溪不得其名異日儻遊會稽當就耆儒一詢之

儀禮注疏十七卷

明閩刊本

得一居葉氏藏書

漢鄭氏注 唐賈公彥疏

前有唐朝散大夫行太學博士宏文館學士臣賈公彥撰序按儀禮有嚴州單注本有成平景德間單疏本朱子自序通解云儀禮以經不分章記不隨經而注疏各爲一書讀者不能遽曉馬碧梧說亦如之是注疏合刻起於南北宋之間而儀禮又在

乎其後又宋人各經皆以注附疏分卷卽依疏之卷數如禮記注疏七十卷是也惟儀禮以疏附注其分卷則依經注之卷數故單疏五十卷而注疏本轉十七卷也此爲李氏元陽刻於閩中每半葉九行每行二十一字其注頗與永懷堂單注相同而爲明神宗時北監本毛氏汲古本所自出阮儀徵亦據之以助校勘者也有得一居珍藏印

儀禮注疏十七卷

明嘉靖刊本

漢鄭元注唐賈公彥疏明汪文盛高澂傅汝舟編校

卷首序題唐朝散大夫行太學博士宏文館學士臣賈公彥撰每半葉十行行二十字注文雙行疏字外加一圓不作黑質白文版心無魚尾惟儀禮卷幾大似宋刊十行本之式汪文盛字希周崇陽人正德辛未進士官兵部武選司主事時以諫南巡受廷杖嘉靖初出知福州有惡政郡人爲立節愛祠傅汝舟編

次其詩集此書當在福州所刊也

儀禮識誤三卷

盧抱經校本

蔣村藏書

宋張清撰

淳字忠甫永嘉人自序稱乾道七年春兩浙轉運判官直祕閣
曾公來守是邦越明年夏欲植教本肇銀儀禮命之校淳亦幸
此書之且有善版也遽拜不辭此書初刊於周廣順之三年復
校於顯德之六年本朝因之所謂監本者也而後在京有巾箱
本在杭有細字本渡江以來嚴人取巾箱本刻之淳首得嚴本
據以參羣本不足則質之疏質之釋文又不足則闕之哀所校
之字次爲二卷以釋文誤字爲一卷題曰儀禮識誤云云按曾
公名逮字仲躬以吏部守溫州有善政是書經義攷注已佚館
臣錄自大典付聚珍版以行盧抱經又校正之有蔣村珍藏印
蔣村姓蔣名炯字葆存蔣村其號也仁和廩貢官湖北廣濟知

縣性喜收藏典籍所居三墩山環水阻長松古梅彌望無際聚書萬卷條然物外

儀禮圖十七卷

元刊本

查梅谷藏書

宋楊復撰復字茂才號信齋長溪人嚴陵趙彥肅作特牲少牢二禮圖質於朱子朱子以爲更得冠昏圖及堂室制度并攷之乃佳復因原本師意錄十七篇經文節取舊說疏通其意各詳其儀節陳設之方位繫之以圖凡二百有五又別爲儀禮旁通圖三十有五紹定戊子自爲序之前有晦庵朱文公乞修三禮奏劄及陳普後序按宋槧本每半葉十行行二十一字元槧每半葉亦十行行二十字此則元刻本也旁通圖已闕有查氏悔餘印馬玉堂笏齋吳江凌氏藏書凌淦字麗生一字礪生諸印悔餘名慎行初名嗣璉字夏重晚號初日老人海甯人康熙癸未進士官翰林院編修著有敬業堂集

儀禮圖殘本四卷 元刊本

此僅存卷二卷五卷六卷七凡四卷据拜經樓藏書題跋云以此元槧本校通志堂刊本則通志之刻圖甚謬也似未可因殘闕而棄之耳

儀禮要義五十卷 影宋鈔本

此爲魏了翁所撰九經要義之一於每篇各爲條目卽節其注疏錄於下方與周易要義略同儀禮諸儒訓詁自喪服諸傳外隋志四家舊唐志亦四家新唐志三家今惟存鄭注賈疏鄭注古奧賈疏蕪蔓了翁刪剗分臚品節度數條理秩然鄭賈精華備是矣

儀禮要義五十卷 歸安嚴修能手鈔宋本

此爲嚴九能元照手寫小楷精絕並加校正兵火所經僅存二十十三卅四卅五卅六卅十卅一卅二卅七卅八卅九五十凡

十二卷末有盧文弨跋云此書罕傳朱錫鬯未之見歸安嚴文學元照聞杭州汪氏有宋刻亟以二百六十千購之甚寶惜手鈔副本以示索觀者元和顧廣圻跋云此書真天地間第一等至寶不徒因宋槧而珍重也今之儀禮注疏依十七篇爲卷而賈氏之元第世不復見黃憲圖所藏景德單疏本失去卅二至卅七六卷是一大闕陷事今以此相校則其分卷之處景德本所有既若合符節景德本所無正釐然具存一一可取以補全其爲功於賈書者甚大至其文句與今本異者必與景德本合如聘禮記對曰非禮也敢唐石經敢下衍一辭字自宋以來經注各本皆仍其譌賈疏云介則在旁曰非禮也敢張忠甫嘗據以證辭之爲衍字者也今注疏本增辭字致爲鉅謬惟景德本及此未有也此類尙夥特撮舉其崖畧又有徐養原跋校語尤多及元照自記有嚴修能及張氏秋月字曰香修印香修蓋其

妾也

經禮補逸九卷

明宏治刊本

汲古閣張綺堂藏書

前有汪克寬自序又有洪武二年臨江曾魯序宏治六年少詹事程敏政序並題環谷汪先生真像後云先生諱克寬字德輔一字仲裕世居祁門桃墅自文公朱子一傳爲勉齋黃氏再傳爲雙峯饒氏三傳爲東山汪氏卽先生仲大父而先生實嗣其傳元泰定中舉於鄉已而棄去當高廟初召至京師與修元史書成不願仕賜金幣歸其書本朱子經傳通解別爲義例以吉凶軍賓嘉爲綱條目甚晰集儀禮周官六小戴記易詩書春秋傳孝經家語及漢儒紀錄凡有合於禮者各著其目列爲五禮此大略也先生五世孫文椿等力爲刊布別錄關文行狀之類附於後書則細字密行刊頗精工有汲古閣毛晉汲古主人毛氏子晉毛晉私印汪魚亭藏閱書諸印

鄉射禮集要一卷

明弘治刊本

古鹽張宗樞藏書

此書爲署華亭學教事三山傅鼎撰前有鼎自序曰宏治壬戌春南畿督學陳公琳自翰林出爲才御史甫下車大興文教以學者不可一闕故射爾游以博其義理之趣乃檄諸郡舉行先是宜春劉侯琬守松逾年百廢具舉偕賢僚貳祗承厥意亟葺射圃制射器謂鼎亦嘗有志俾董其事爰輯舊聞而略其戒賓獻酬之節增入周禮延射揚觶二事又訂攷聲律以大成樂音諧之被之詩歌管絃既竣事適督學公按臨命試行之頗謬見取俾鼎擴其事與四方同志共之此是書之大較也有古鹽張氏宗樞泖村三印宗樞字泳川號藕村海鹽人其藏書之所曰紅藥山房著有藕村詞二卷

儀禮戴記附記四卷外記一卷

明天一閣舊鈔本

按天一閣書目載此書藍絲欄鈔本不著編輯人姓名攷明史

藝文志爲明黃潤玉著引楊守陳之說曰先生以朱子嘗欲編禮記附儀禮乃取儀禮析爲四卷而以禮記比類附之不類者附諸卷首末亦各有意義又以五禮獨闕軍禮因取周官大田禮補之而以禮記諸篇載田事者附焉別爲一卷皆爲之注釋射史八卷 明刊本

新安程宗猷伯嘉編輯宗弟程夢周于行校定

前有宗猷自序及夢周題序又有陳繼儒序一篇此書一爲大射之儀二爲鄉射之禮三爲周禮六官四爲射義射錄五爲名射六爲弓矢錄七爲射器圖八爲射法直述并圖

讀儀禮私記二卷 寫本

前卷自士冠禮至有司徹止後卷亦如之中間列降正義服攷定一小卷下題長洲後學江筠識云降正義之服信齋有圖勉齋有例蓋降服之文見於傳記正義之名定於注疏所以別布

縷之精粗明服制之輕重其說誠不可廢也然疏家之說前後
牴牾圖例所開彼此互異今參合二家折衷疏義別爲序次如
左而其所以更定之意則各爲之說而總附於其後按筠爲乾
隆間人前後兩卷偶有筠按之字故知爲一人所記也

儀禮商一卷

舊寫本

四明萬斯大學

斯大字充宗鄞縣人是書取儀禮十七篇每篇各爲論說時見
新義雙黑口上下魚尾書法古拙當爲康熙間舊本有忠實世
家絲竹山房煙波畫船古吳潘介祉叔潤氏收藏印記

內外服制通釋七卷

鈔本

宋車垓撰

垓字經臣天台人咸淳中由特奏名授迪功郎浦城縣尉垓與
從兄若水皆受業於季父安行安行受業於陳埴埴受業於朱

子故是書一仿文公家禮而補其所未備有圖有說有名義有
規要凡正服義服加服降服皆推闡明晰具有條理前有至元
後乙卯爲屋野人牟楷仲裘序後有男瑤從子惟賢及東海布
衣張復三跋

喪服制攷八卷

精鈔本

秀水後學朱建子辰始氏輯長男丕武謹校

前有康熙四十八年元宵後一日自序云少從學於俞漸川先
生之門時取婚喪葬祭之禮進諸生而攷論焉余故於古禮今
制之同異頗識一二己丑元旦奉我高曾祖考像於堂余侍坐
於側取禮經儀禮家禮諸書讀之愀焉悽焉如提命焉夫禮經
四十九篇而專言喪禮者十有三篇弓曾子問喪服小記雜記
喪大記奔喪問喪服問閒傳三年問喪服四制其他曲禮王制
禮器玉藻大傳少儀諸篇亦多言及喪禮焉儀記十七篇而專

言喪禮者四士喪禮既夕禮士虞禮喪服禮其他特牲饋食少牢聘禮諸篇亦多言及喪禮焉漢有石渠閣之議晉雖崇清談尙老莊而論喪服之儒獨多而詳唐太宗命魏徵令狐德棻等議貞觀律而定服制蕭嵩奉元宗敕而修開元禮至宋徽宗命續修新儀而有政和禮司馬溫公撰書儀朱子定家禮皆頒諸天下而行之當世者也其他許敬宗李義甫上顯慶新禮劉岳刪定書儀聶崇義集三禮圖劉溫叟撰開寶通禮歐陽修纂太常因革禮諸儒著述又自漢迄今千八百餘年雖代有損益亦不過小過不及之間獨明太祖改制度定禮樂秩然一變然洪武初詔采朱子家禮爲大明令大畧皆存古制自洪武七年皇貴妃孫氏薨命羣臣議喪禮撰孝慈錄古禮盡易昔我夫子生周之世爲周之民嘗論樂而謂武盡美矣未盡善也安在生今之世不可論今之禮而况於易世乎於是將服制之古有今無

古無今有古重今輕古輕今重者一一詳攷而備錄焉建子爲
彝尊從子學有淵源故能該洽四庫存目謂其字辰起此本
作辰始殆是原本耳

右禮類儀禮之屬

監本纂圖重言重意互注禮記殘本 宋刊本 周九松藏書

按傳是樓宋元版書目有是書凡二十冊此僅存卷第九玉藻
明堂位卷十喪服小記大傳少儀兩卷耳標禮句之同者爲重
言禮意之同者爲重意蓋唐宋人帖括之書也 天祿琳琅載
有監本纂圖重言重意互注點校毛詩與此正同有毘陵周氏
九松迂叟藏書記周良金印周氏藏書之印又有葉志詵東卿
過眼印書面題字爲翁覃谿手筆良金字九松號迂叟常州人
明嘉靖三十年歲貢官光祿寺署丞志詵字東卿漢陽人官戶
部郎中有平安館藏舊刻書畫最富覃溪名方綱字正三順天

大興人乾隆壬申進士官至內閣學士左遷鴻臚寺卿

禮記二十卷

明嘉靖續宋本

蕭山王紹蘭藏書

鄭氏注

首行題禮記卷第一次行頂格曲禮第一越四格禮記越二格
鄭氏注次行頂格經文起每葉十六行行十七字每卷後來注
經幾字注幾字此亦明嘉靖間徐氏繙刊宋本三禮之一也按
今所傳宋本一爲萬卷堂余仁仲刊有音義本卷末總注經凡
九萬八千一百七十一言注一十萬九千三百七十八言一爲
撫州公使庫刊有釋文四卷并校正銜名是書卷首行款卷尾
夾注皆同惟無音義及最後總注耳 天祿琳瑯所藏仁仲本
校列不同注疏監本之字及陳鰾經籍跋文所校撫州本之異
文一一牒合徐氏此本大約從兩宋本所出耳卷端有知足知
不足館人王紹蘭所見一印紹蘭字南陔蕭山人乾隆癸丑進

士官至福建巡撫兼閩浙總督生平學務淵博無所不窺著述最富

禮記注疏六十三卷

明閩刊本 得一居葉氏藏書

漢鄭氏註唐孔穎達疏陸德明釋文

前有禮記正義序題國子祭酒上護軍曲阜縣開國子臣孔穎達等奉敕撰與七經孟子攷文所記宋版題式及數字提行同更有禮記正義阮氏校勘記謂此篇卽曲禮二字正義正德嘉靖二本均列可知十行本亦載也舊新唐書志晁氏陳氏書錄皆云七十卷乃旣不用經注卷數又不用正義卷數併爲六十三卷使唐人卷次不可得知此爲閩中李元陽刻每葉中縫著記疏字尙是十行本舊式有得一居珍藏印

禮記集說一百六十卷

影宋鈔本 吳氏縉谷孫氏壽松堂藏書

通直郎知常州武進縣主管勸農事主管運河隄岸專一檢點園

田事借緋臣衛湜表上

湜字正叔吳郡人寶慶二年表上此書得擢祕閣後以朝散大夫直寶謨閣知袁州自作前後兩序及跋尾閱三十餘載採鄭注而下凡一百四十四家其他書之涉於禮記者尙不在此前有臨邛魏了翁序紹定辛卯趙善湘鈐版江東酒院越九年復爲覈定別刊於新定郡齋傳本絕稀江陰李貫如一從事三禮借是書於絳雲樓焚香肅拜而後起視餘姚黃宗義購歸祁氏曠園遺籍途中爲書賈竊去是書見之於所撰天一閣藏書記中則當時之珍重可知矣自刊入通志堂後學者始稍稍見之此當爲網蘭氏未刻以前所鈔經吳氏瓶花齋孫氏壽松堂校藏有孫氏景高仰曾之印繡谷等圖記尤可寶也按宋本道光間藏於上海郁泰峯家同治間歸於豐順丁雨生中丞持靜齋書目識云緋紙初印魏鶴山序已殘缺僅存了翁二字鶴山書

院一印通志堂補遺錯誤尤甚者七十三卷七十六卷七十七卷九十六至九十九卷仰曾字景高號虛白仁和人歲貢候選鹽運司運同繡谷者錢塘吳焯別號也焯字尺鳬城之父家有繡谷亭植朱藤一本歲月既久花時柔條四垂如瓔珞故以自號著有繡谷薰習錄則紀所藏祕冊也

禮記集說十六卷

明正統經廠本

陳皓集說

是書十六卷陳仲魚有元刊本首題禮記卷第幾次題後學東匯澤陳皓集說爲天厯戊辰建安鄭明德宅刊行此書標題卷第與元刊合惟無後學東匯澤五字前有自序後有凡例五條首校警經文次援引書籍次注說去取次音義反切次章句分段與元刊亦合皓字可大都昌人宋亡不樂仕進教授鄉里學者稱雲莊先生其父大猷爲饒雙峰弟子雙峰師黃中立爲朱

文公再傳弟子故得藉其餘蔭按 天祿琳琅載此書首刻司
禮監欽奉聖旨五經四書經注刊本字有差謬恁司禮監將易
程朱傳義書蔡沈集傳詩朱氏集傳春秋胡安國傳禮記陳澧
集說四書朱氏集注都騰寫的本重新刊印便於觀覽欽此正
統十二年五月初二日此本大約因司禮監所刊割去前葉以
掩其迹耳

禮記集說三十卷

明嘉靖間元本

前有後學東匯澤陳澧自序又集說凡例五條以下更有今所
取諸儒姓氏除舊引書籍已見外餘闕於左自周子暨臨川吳
氏凡四十二家又集說總論五條此正統本所無也書作三十
卷與經義攷所載相符每葉二十二行行二十字又與陳澧經
籍跋文所載元本合當是嘉靖間南康逸老堂所刊澧書成於
至治壬戌入元已四十二年越五年至天曆戊辰始刊行自序

言書成甚欲就正於四方有道而衰年多疾遊歷良艱姑俟來
哲自永樂中胡廣等修五經大全禮記始用濬之集說爲主頒
行學宮四百年來以之取士亦運會使然也今本併作十卷並
遺凡例遠不及此矣

禮記集說三十卷

明嘉靖閩中刊本

前爲後學東匯澤陳澍自序次爲禮記篇目序後列嘉靖十一
年十二月日福建等處提刑按察司爲書籍事照得五經四書
士子第一切要之書舊刻頗稱善本近時書坊射利改刻袖珍
等版款制褊狹字多差謫如巽與譌作巽語山吾譌作猶吾之
類豈但有誤初學雖士子在場屋亦譌寫被黜其爲誤亦已甚
矣該本司看得書傳海內版在閩中若不精校另刊以正書坊
之謬恐致益誤後學議呈巡按察院詳允會督學道選委明經
師生將各書一遵欽頒官本重複校讐字畫句讀音釋俱頗明

的書詩禮記四書傳說如舊易經加刻程傳恐只窮本義涉偏
廢也春秋以胡傳爲主而左公穀三傳附焉資參攷也刻成合
發刊布爲此牒仰本府著落當該官吏卽將發去各學轉發建
陽縣拘各刻書匠戶到官每給一部嚴督務要照式翻刊縣仍
選委師生對同方許刷賣書尾就刻匠戶姓名查考再不許故
違官式另自改刊如有違謬拿問重罪追版刻毀決不輕貸仍
取匠戶不致違謬結狀同依准繳來故牒建寧府此雖禮記一
書足概明時法制謹嚴垂憲經籍之義是刻每半葉九行行十
七字小字雙行版心上下黑口工匠人名作白文

禮記纂言三十六卷

明正德刊本 吳氏瓶花齋藏書

臨川吳澄幼清

是書爲澄晚年手定每書一卷爲一篇大旨以戴記經文龐雜
疑多錯簡取每一篇中其文皆以類相從俾上下意義聯屬貫

通而識其章句於左共三十六篇次第亦類相從凡通禮九篇喪禮十一篇祭禮四篇通論十一篇各爲標目如通禮首曲禮則以少儀玉藻等篇附之皆非小戴之舊惟其排比貫串頗有倫次所解亦時有發明較之王柏刪詩有間矣前有正德庚辰冬至後學餘姚王守仁序云胡汝登忠信而好禮其爲甯國也將以是而施之刻纂言以敷其說後有崑山魏校序云甯國守胡君東舉刻是書嘉興與四方之士其爲政知所先務矣卷前有吳城敦復東萊呂氏明農草堂圖書諸印

禮記大全三十卷

明刊本

此明永樂中翰林學士胡廣等奉敕撰前有胡廣楊榮金幼孜等四十二人銜名並陳澔序大全總論顧氏日知錄曰八股行而古學棄大全出而經說亡然當時功令所垂不獨內府刊行而風聲遠到外間坊肆亦相率鐫印此亦其一也

檀弓叢訓二卷

明嘉靖丙辰姚安府刊本

三十一

書目下題附謝疊山批點六字夾注批見注後點見文傍八字
前有嘉靖丙申永昌張含序稱楊子用修居滇含手吾翁少司
徒所綴宋疊山謝氏點勘檀弓以似則曰茲錄奇矣所病遺耳
舊詒如康成之簡牘達之明奚弗取濫之集說之雜奚弗汰澄
之纂言旁通奚故而廢乃以爲叢訓姚安太守柳濱吳君安甯
貳守有運張君巖司玉峰李君謂弗可弗梓贊校書還則張應
極含也後有楊慎自敘上卷一百二十二條下卷九十二條末
有宏治壬戌永昌張志瀄題云此本圈批前俱有至季武章起
止有圈而無批前亦有不盡然者至於所以然之意復有去取
不可曉者今雖少爲增補而卒亦草草也當爲謝氏批點而識
按疊山名枋得字君直弋陽人寶祐四年進士宋亡絕食卒明
萬曆丙辰烏程閔齊伋謂得謝高泉所校舊本始以朱墨印行

而不知先有宏治張氏增補之本也用修名慎號升庵新都人
正德辛未進士第一投修撰以諫大禮謫戍滇中

檀弓通二卷

明鈔本

橋李曹氏藏書

宣城徐昭慶穆如輯注

前有萬厯庚戌梅鼎祚撰檀弓攷工二通總序此編引用漢唐
宋元明先儒姓氏書籍凡三十九家凡例云是注本之漢唐切
注及集說大全於中晦者明之略者詳之所未安者釐之一句
一字務期通曉妥當可以見其大旨矣有海甯陳氏珍藏書畫
之印及橋李曹氏印殆倦圃曾藏也

禮記疑義七十二卷

舊鈔本

鄭氏注孔穎達疏吳廷華存疑

是書體例與周禮儀禮同愛日精廬藏書志周禮儀禮皆錄有
廷華自序禮記無之今存卷三四五廿廿一廿六廿七廿八廿

九三十卅一卅二十六十一六十二六十三六十四六十五六十
六僅一十八卷闕者尙五十四卷而儀禮且無一葉之留東南
兵燹斯文墜地恐無從訪求全書矣

續禮記集說一百卷

舊鈔本

仁和杭世駿大宗撰

前有自序云衛氏集說采葺雖廣大約章句訓詁爲多卓然敢
與古人抗論者惟陸農師一人而已通籍後與修三禮館吏以
禮記中庸學記喪大記玉藻諸篇相屬條例既定所取資者則
衛氏書也從永樂大典中有關於三禮者悉皆錄出在衛氏後
者宋儒莫如黃東發元儒莫如吳草廬乃經學之駢枝非鄭孔
之正嫡得一岸然自露頭角者如空谷足音楚然喜矣按所採
凡一百八十餘家合衛氏書讀之亦可云禮經淵海矣此書本
未經刊刻卷帙既繁鈔本亦鮮可貴也

大戴禮記十三卷

元至正刊本

伊藩舊藏

漢九江太守戴德

漢書儒林傳德字孝宣嘗爲信都大傳戴聖則爲九江太守今德書乃題聖官未知何據本八十五篇隋志所錄已佚其四十七篇周盧辯注十三卷中亦僅八卷餘五卷無注也後有韓元吉序蓋淳熙乙未刻於建安郡齋時作辯字景宣官尙書右僕射周書有傳元吉字无咎潁川人甯宗時官吏部尙書明袁聚有翻宋本傳亦甚罕此爲至正甲午嘉興路總管劉貞所梓鄭元祐有序每半葉十行行二十字版心刊大小字數刻工姓名篇後間注章數字數卷端有伊王親宗之章圖記伊藩朱謐鈔明太祖曾孫成化十一年封正德三年薨諡日定

大戴禮記十三卷

明刊本

盧抱經校藏

漢梁人戴德著

藏書志卷二

三

隋書經籍志大戴禮記十三卷漢信都王太傅戴德撰後分卷不同篇數不一惟清熙之末韓元吉序稱大戴篇始三十九終八十一當爲四十二篇中間缺四篇重一篇實止三十九篇抱經先生以程榮本對校又以元劉貞字庭幹本對校並補錄至正甲午鄭元祐爲貞撰重刊序可稱善本矣有數間草堂藏書虎林盧文弨手校盧文弨字召弓文弨校正抱經堂印大小五印

大戴禮記補注十三卷

趙秀門校藏本

曲阜孔廣森撰

此爲郭軒孔氏所著書之一郭軒名廣森官翰林院檢討前有阮氏元撰序曰大戴記自漢至今惟北周盧僕射爲之注且未能精備自是以來章句澗涔古字多舛良可慨歎近戴東原盧紹弓相繼校訂踈逖畧闕檢討乃博稽羣書參會衆說爲注十

三卷使二千餘年古經傳復明白於世用力勤而爲功鉅矣此書又爲趙春沂覆校前有跋云丁小山先生於世間所有大戴本悉取而校之蓋數十年於此矣最後得孔氏補注本丹黃點勘詳加校正益之評證最善本矣春沂從孫貽穀侍御借錄此朱筆所錄及校語皆不著別者是也至此外所引校語稱廬者抱經學士也稱孫者貽穀侍御也王者念孫給事也阮者芸臺侍郎也稱黃稱嚴者相國九能兩茂才也間有管見則以墨筆附之可謂善而又善之本矣有趙春沂校雠門校過醉經樓趙氏家藏趙氏種芸仙館藏書印春沂字雋門後更名鉞仁和人嘉慶辛未進士官泰州知州醉經樓者先生藏書處也

孔子三朝記七卷 鈔本

洪順煊注釋

前有自序曰孔子抱撥亂之才生衰周之際周流四方迨哀公

十一年自衛反魯三朝魯君反復陳詞大愾歸於戒淫色慎取人明天人之應別君臣之分而終動之以慕義諷之以失政惜終不能用也門弟子退錄此記漢興藏在祕府傳其學者則有戴德劉向劉歆揚雄班固許慎諸家魏世中經猶藏此本逮及大朝臣瓚郭璞裴松之鄭道元猶遞相引證至唐以後篇籍始亡今所傳者惟大戴所錄遺文譌舛微言斷絕自北周盧僕射注後鮮有緒論沈薤已千餘年顧烜董而理之注成七卷別作音義校其同異附於左方嘉慶辛未曾刊以行印本甚罕此則影鈔者也

夏小正四卷

校本

夏小正本大戴禮記之一篇隋書經籍志始別著錄爲一卷注曰戴德撰宋傅秘卿序稱隋重賞以求逸書進書者務多以微賞帛故離析篇目而爲此理或然歟惟屢經傳寫與本文混淆

爲一崧卿始從杜預春秋例先列正文後附傳文釐成四卷而附以注釋震澤任兆麟復爲之注此本又臚引諸說注於上方當爲乾隆諸老手筆

夏小正注一卷

舊鈔本

此舊鈔本不著撰人姓氏前後無序跋其體例先載書傳次列諸家舊注附已說於後其所引金氏者爲仁山先生說張氏者稷若先生說其夾簽楷書者爲董氏方立此外則不知何人手筆其辨證詳確於文字假借聲音異同亦多所發明福州梁氏多襲其說是爲乾嘉時人所著也

右禮類禮記之屬

三禮攷注六十四卷

明刊本

元翰林學士臨川吳澄幼清撰

前有成化九年大理卿仁和夏時正求校三禮攷注致羅念菴

書並跋稱攷注版刻無傳時正以使命蒞南昌按察副使夏君寅以錄本相示云得於翰林張君元楨余因建昌守謝君士元以詩樂爲教許以堂食之餘釵梓並請狀元羅君倫訪善本正字倫故爲序士元爲跋士師楊士奇亦有跋并綱領序錄士奇謂是書經元季兵亂藏於吾邑康氏後爲郡中晏璧所得遂掩爲已作書中所增義率多混淆豈璧所爲云云倫序中亦辨之朱彝尊經義攷則稱草廬先生周官禮乃其孫當所補儀禮則有逸經藏記則有纂言與今傳三禮攷注多不合其爲晏氏僞託無疑時正字季鶴正統十年進士嘗撰成化杭州府志

三禮圖二卷 精鈔本

江夏劉績用熙著

績又號蘆泉宏治庚戌進士官至鎮江知府是書蓋推廣薛崇義之圖而爲也所圖一本陸佃禮象陳祥道禮書林希逸攷工

記解諸書而取諸博古圖者爲尤多雖宣和博古所圖未可盡據然所采附陳諸家之說亦足備一解其宮室制度輿輪各物凡房序堂夾之位轉較賢數之分亦皆一一分晰其他琤茶曲植之屬增舊圖所未備者又七十餘事存之以示兼收並蓄之義曝書亭舊有鈔本此亦從之影寫也

右禮類三禮總義之屬

禮書一百五十卷

元刊本 季滄葦藏書

左宣義郎太常博士臣陳祥道上進

前有進禮書表次祥道自序祥道字用之福州人元祐七年進禮圖儀禮注除館閣校勘明年爲太常博士賜緋衣旋卒其書貫通經傳縷析條分前說後圖攷訂詳悉不得以客王安石故而廢其書元祐刊本早佚今惟此閩趙宗吉從宋本翻雕者每半葉十三行行二十一字版心有字數雍虞集有重刻禮樂書

總序有季振宜藏書五硯樓曾在上海郁秦峯家遂江借觀諸印振宜字詵兮號滄葦揚州泰興人順治丁亥進士歷官御史所藏宋元版書及影宋元版鈔本甲於海內著有藏書目一卷五硯樓者吳縣袁廷樸藏書處也廷樸字又凱號綬階又號壽皆書萬卷皆宋槧元刻影寫精鈔時論稱之泰峯名松年字萬枝上海人恩貢生好讀書購藏數十萬卷刊宜稼堂叢書行於世遂江姓胡名忠孚平湖人構小重山館儲藏多宋元精刊及前賢校本著有小重山館書目

儀禮經傳通解集傳集注三十七卷 宋刊本 王蓮溪藏書

是書家禮六鄉禮四學禮十五邦國禮五王朝禮十四前有嘉定癸未孟秋四明張虞識目錄後載朱子乞修三禮劄子其孤在有嘉定丁丑八月謹記云此先君晚歲親定絕筆惟書數一篇缺而未補而大射禮聘禮公食大夫禮諸侯相朝禮皆未脫

蔡王朝禮卜筮篇亦缺餘皆草定而未刪改惟喪祭二禮則嘗以屬之門人黃幹云云卽指勉齋所續之二十九卷也後有嘉定癸未門人三山楊復及陳宓二跋其書初刻於南康道院再刻於江左書院每葉十四行行十五字夾注同版心有大小字數刊工姓名於匡微恒慎敦讓字有闕筆於儀禮則全載鄭注節錄賈疏每引溫本及成都石經足訂注疏之謬有高氏鑑定宋刻版書甲宋本海叟氏汲古主人毛晉灌稼村翁隱求書室蓮涇太原叔子藏書記沈士業印耕野諸圖記海叟者袁凱別號也字景文華亭人明洪武中由舉人薦授監察御史以病免歸事蹟具明史本傳蓮涇姓王名聞遠字聲宏晚號灌稼村翁太倉州人著有孝慈堂書日多宋元祕本

右禮類通禮之屬

文公家禮儀節八卷 明萬曆刊本

後學邱濬輯楊廷筠訂錢時刊

前有朱子原序及黃氏幹諸儒論說書本五卷瓊山先生復衍以圖式參酌編次一通禮二冠禮冠圖三婚禮婚圖四喪禮喪圖五喪葬喪圖六喪虞七祭禮祭圖八雜錄序而行之又經楊廷筠所訂按元應氏家禮辨其文不傳僅見於是書廷筠字作堅萬厯乙未進士累官順天府丞魏闕用事乞歸府志入名臣傳應氏武林籍廷筠亦仁和人先後皆吾鄉先哲羽翼此書不僅以刻工精好版字寬大爲可寶也

右禮類雜禮書之屬